

雪門詩州 二冊



10741

蒿目集敘

蒿目時艱之見豈必叔季時爲然乎卽

明盛時

亦有之

當堯之時洪水懷襄龍蛇鳥獸偪人君臣黷黑胼胝一

堂吁咈此中天之蒿目也武王之時飛廉惡來虎豹犀

象人物交害繼又殷頑蠢動遺大投艱周召篤棊乃弗

克迷此成周之蒿目也大抵宇宙氣機無久治而不變

之理非必有失德也 朝廷以休養爲心深仁厚澤疊

沛臣庶臣庶被之狃習爲常上不知感戴下不知自警

於是驕怠生而苞蘖萌天遂欲以剝而後復損而後益

雪門詩草

蒿目集序

者警天下之心思耳目而剗天下之積玩以使之更新
乃於其時生構亂者數人釀亂者數人又特生戡亂者
數人分散於朝野上下名山大澤中若無意置之又若
有意參之錯之使之相背相際相克以成治而變變而
復治之局其間嚴凝肅殺之氣適所以貞固國家之基
而綿其祚焉亶然矣 本朝控馭臣下制越千古構亂
者無亂臣而皆亂民至因循釀亂則諸當軸疆吏及諸
將帥不能辭咎而吏科之糾繩迂儒之拘守華士之簧
鼓又適足以助益之可歎也 瑤 以末吏羈海隅無戡亂

才無戡亂柄并幸無釀亂權而此身此家適值變際目擊亂之由釀心已懍懍至覆轍相尋蹈釀而加釀者又若不遺餘力焉遂使四海羣生同與大變卽抱戡亂之才者間亦灰身殉難敗壞幾不可言矣仰賴 皇極光明蒼天眷佑日月重新十餘年劇寇卒削平之然蹂躪十六省淪陷六百餘城昔之名都勝區悉成瓦礫文章典籍盡付灰煙稊粃赤子或以擄掠死以鋒刃死以饑病死萬里荒涼黃蒿白骨相枕蔕_際之良朋密友半遭

大劫卽此身此家亦幾幾不免五夜思之不能鬱而無

雪門詩草

蒿日集序

二

所發此蒿日集之所由作也顧天下當明盛時則潤色鴻猷之碩彥以文章昭景運不幸遇變時則悲歌之士以牢騷抒素抱二者之詩不相謀亦格不相入惟生際中興者閱繁華而忽逢凋敝則寄懷疇昔由凋敝而忽見承平則追溯前艱憂樂不妨互寫美刺不妨并商言者無罪聞者足戒俾得傳一時艱難之景况以播於人世之耳目而其人往往不在山林而在縉紳中蓋見聞旣確而傳述乃真切也此次粵寇出犯吾楚先受其荼毒知釀亂之由者楚人最悉而今之戡亂者楚人又最

盛說者謂瑞氣纏長沙故長沙累危而得全軫與角連
將星亦出長沙故言事者有天下不可一日無湖南之
奏而不知究其所謂將者文將耶武將耶若以武論則
南人寬柔萬不能勝於西北惟其於天下之事有纏綿
難已之思抑鬱必發之志堅忍不搖之守安於險阻耐
於煩劇淡於世故不以小得失擾其前後不隨流俗
之是非爲轉移而後於世變之糾紛有以靜持之而徐
圖之恭逢 聖君在上又不忍急切責其効此粵賊之
以堅忍構禍而禍成吾楚諸老成卽以堅忍戡亂而亂

雪門詩草

蒿目集序

三

亦卒戡之由也此溫柔敦厚之旨也瑤之作蒿目集也
亦體此意以始終之嘗念生平作詩不敢期驟成亦不
敢有間志或孤館寂寥夜闌更靜或扁舟水際謝絕人
事於是俯仰旁思取此身此世人情物態之變而曲爲
思之繪之如是者已廿年矣未審今之戡亂者人旣喧
傳吾楚將來之論遭變詩持論平允而真切者果屬何
人也

同治五年歲在丙寅季春之月道銜浙江嘉興府知府
善化許瑤光敘

雪門詩草卷三

蒿目集

善化許瑤光雪門甫著

癸丑年

輕紈詠

輕紈浮碧光耀人。重紈含采穩稱身。世俗愛薄不愛厚。
金梭粟尺無精神。輪困扶桑甕大繭。入盆繅作織織綸。
重花密葉究何有。泣紅染碧嬌青春。吳王宮中舊白紵。
此曲今人棄如土。織素不如織縑人。請問蘼蕪山下女。
軋軋鳴機濯錦坊。夜深明月照流黃。千金爲輕五銖重。
雪門詩草

卷二

蒿目集

翻黃轉綠紛無常。吁嗟乎人間巧樣新花鬪。天孫空織
雲錦裳

野田黃雀行

野田黃雀飛且鳴。褐翎蠟喙銜香秬。香秬旣飽汝還啄。
青青黍不見。玉銜環坐待黃花哺。蓬蒿小鳥何足噉。請
君休費明珠珍。巢堂穿屋任所欲。大厦千間容雜賓。

蒼鷹詠

鵲巢擇疏木。鴉棲投密林。蒼鷹爾何意。瀟灑萬里臨。香
漢縱顧盼。一呼衆鳥噤。非無忍饑日。不生爭啄心。願借

晨風翼追之碧雲深

擬古

琉璃一觸碎。賦質爲剛烈。奈何紈綺柔。著手亦中裂。全
毀有天心。成敗無定說。失地蘭見鉏。得地茅包潔。人生
有遇合。無失本來拙。
奉詔求賢材。感然起難色。良相兼良將。千古不一得。蒼
鷹豈解舞。白鶴甯知擊。位置失生平。前勲都敗績。用人
良有宜。用世請自擇。莫將軒鑑材。錯任干將職。

朝登衡嶽望。遙見綵雲生。金碧起樓閣。糾縵難爲名。不

雪門詩草

卷三
蒿日集

近太陽色焉。能鬪光晶羣。材蒙帝力。神化丹青成。彪炳

照寰宇。竹帛垂芳聲。感此懷帝子。騎龍還玉京。

煜煜紫霄星。明暗色不齊。赫赫中朝彥。黑白無端倪。含

香搢象笏。五夜聽鳴雞。誰人陳利弊。流涕玉階墀。狂直

賈時忌。完膚生瘡痍。縱博主恩宥。終遭同類擠。王嬙被

遣嫁。嫖母居深閨。壅蔽成媒藥。心傷白日低。

夜蛾向明飛。那知是膏火。佳人生憐心。吹燈月中坐。隣

院炳銀燭。趨投竟罹禍。熱中出本性。奔競喪真我。千秋

名利場。幾人脫疆鎖。

滄○浪○水○清○濁○童○子○無○心○歌○隨○風○入○聖○耳○觸○撥○天○機○多○淺○
語○含○深○警○近○思○成○琢○磨○達○人○無○滯○慮○明○鏡○萬○象○羅○冥○冥○
察○飛○鳥○悠○悠○悟○逝○波○愚○者○昧○物○象○經○史○空○編○摩○
鷓○鴒○翔○青○冥○羅○者○視○戴○澤○杏○壇○脫○冕○行○人○疑○肉○食○客○赤○
鳥○負○屨○心○流○言○遍○東○國○道○高○疑○轉○多○詣○孤○俗○難○測○悠○悠○
千○古○情○仰○視○浮○雲○白○
天○地○生○殺○氣○蕭○瑟○中○原○土○都○會○變○沙○場○白○骨○連○吳○楚○干○
戈○起○機○械○劫○火○燒○歌○舞○彼○蒼○固○無○情○人○心○先○失○古○轉○怪○
羲○皇○興○多○事○造○網○罟○

雪門詩草

卷三
蒿日集

三

秦○皇○鑄○金○人○胡○不○封○鐵○山○開○鑿○無○已○日○嶽○爪○坐○傷○殘○沉○
此○石○中○火○延○燒○遍○塵○寰○西○疏○發○金○色○南○硝○逞○銀○顏○后○土○
果○何○意○物○產○生○波○瀾○元○黃○血○戰○腥○占○坤○淚○不○乾○

浮○世○如○浮○雲○變○幻○無○舊○態○初○看○樓○閣○生○轉○盼○浪○花○碎○惟○
有○雲○中○天○萬○古○青○笠○戴○照○我○以○白○日○使○我○明○向○背○蒼○蒼○
彼○路○長○耿○耿○余○心○對○
兩○馬○共○搖○鞭○一○馬○忽○在○前○兩○帆○乘○風○走○一○帆○遙○落○後○早○
達○與○晚○榮○天○心○究○何○有○甘○羅○耀○青○春○梁○顛○登○白○首○遇○合○
會○有○時○陶○然○飲○吾○酒○

人生逐榮華。逐逐成頭白。蜂蝶逐春花。逐逐春如客。不妨暫留連。何事相追迫。閒雲近旭日。自爾生奇色。奔雲空自忙。靜觀情脈脈。

擬古行路難

黃塵吹入金叵羅。欲醉未醉愁緒多。老蟾臨江向江泣。似遊江中生蛟鼉。君不見東江白浪如山高。連年拒我乘風舸。西江積石森戈戟。懸絕堅鑿不受篙。水石猶可渡人心。突波濤干戈生阻隔。蛇虺煽腥臊。歸來長歎然。車轍茅屋吹墮松枝雪。買酒鋤梅度歲闌。請君休歌行。

雪門詩草

卷三

蒿日集

四

路難

健兒篇

黃○桑○弓○射○綠○蓬○矢○不○作○健○兒○真○愧○死○健○兒○鼻○息○長○虹○噓○健○兒○筋○骨○青○銅○似○望○屋○微○知○金○字○形○運○刀○莫○灑○黃○回○水○昔○年○落○拓○失○鄉○譽○昨○來○姓○氏○聞○天○子○孔○翠○飄○飄○玉○玦○明○征○南○未○已○還○東○征○桂○海○蟻○珠○滿○囊○貯○旁○觀○切○切○私○語○驚○時○危○文○士○功○名○艱○欲○碎○鐵○硯○雕○銀○鞍○腰○酸○足○繭○據○不○穩○歸○來○仰○屋○空○長○歎○

人生豎儒嘲

泰山膚雲布霖雨。石磴崎嶇盤馬苦。黃河落天潤九州。
泥沙渾泡無清秋。大賢砥柱卽巖岸。焉能鳧波隨聚散。
豎儒蚋喙微隙攢。終日傷人肌無完。安得漢帝溺其冠。
感諷不辭。雖不。爲。此。蓋。

天馬不受金絡頭。神鷹不入綠錦鞵。古來權變飛騰者。
往往難向尋常求。雕章琢句果何益。舍此清時莫名弋。
消磨豪杰遂成拘。鱗集麕至紛迂儒。迂儒已迂休徘徊。
我所思兮鈞天臺。瓊花珍卉入貢獻。尺寸俱非松柏材。
君不見今日碩彥識今古。跨馬春明期鳳舉。玉疵珠類

雪門詩草

卷三

蒿日集

五

抱微瑕請君還去歸蓬戶。

烏鵲怨

粵事失算長沙被圍別簡大臣而所謂大臣者
擁兵湘潭經湘紳促請終不肯來逮賊下陷岳
州乃進屯益陽遷延之咎懼無所歸特參益陽
令不備船幾不免爲作此篇。

牽牛不渡河罪乃歸烏鵲銀漢水茫茫橋梁何處託天
船實可乘河鼓聲交作仙人膽氣虛坐誤星期約遷怒
到旁人世情何險惡可憐小鳥無訴伸雨血風毛幾溝

壑君不見今日大臣誤國罪小臣攬人障箭善保身千
古宦情多類此南飛鳥鵲倍傷神

黃鶴怨

歎武昌失守也十一月初三賊陷岳州棄之不
守疾趨武漢十一日抵漢口副將朱翰率六百
人守漢陽戰敗陣亡十二日知府董振鐸巷戰
死城遂失時冬季水涸江中漲沙賊據船造浮
橋以通武昌總督程尙駐衡州向軍門提兵追
賊至十二月初三日自洪山出戰賊以小隊綴

雪門詩草

卷三

蒿日集

六

我師初四丑刻地雷轟陷望山門巡撫常大清
學政馮培元藩司梁星源臬司瑞元漢黃德道
王壽同前鹽道王東槐鹽道林恩熙武昌府明
善同知周祖銜死之江夏知縣繡麟巷戰死武
昌遂陷賊注意江南得而不守盡驅鄂人登舟
棄城走

神○仙○手○墮○綠○玉○杖○龍○鍾○莫○上○黃○鶴○樓○黃○鶴○崔○巍○出○雲○表○
風○高○天○曠○令○人○愁○愁○煞○巴○陵○傾○長○蛇○噬○象○行○君○山○不○塞○
洞○庭○口○妖○波○直○接○長○江○橫○愁○煞○漢○陽○樹○鸚○鵡○飛○難○渡○青○

山覆笠團團坐見衝霄騰赤霧戰士蟲沙六百人煙
消電捲知何處黃龍青雀束江流白馬紅巾踏地游夾
岸暗鳴崩石壁一條衣帶小於溝夜深吹破梅花笛土
卒酣眠刁斗寂女牆分付明月看虎帳惟聞寒露滴沈
沈更析天難曙節鉞轅深坐悲感一卷韜鈴看復拋黑
風滅燭飛靈霹靂弧忽報有人登地缺天摧慘何極赤
子蠕蠕盡網羅金湯頃刻走狂魔可憐天柝如山積資
寇徒聞金橐駝窖粟藏金肆搜括丹流碧血漫城阿潰
卒焚巢夜縱火珠簾畫棟烟煤多此時江雪正飛花此

雪門詩草

卷三

蒿日集

七

際江水損荻芽。鑿鼓夜喧催去臘。炮車朝響逼年華。春
朝三日棄城遁。江南江北生黃沙。晷夜夜啼城畔楚
臺白氣如雨散。夏逆曾煩聖祖兵。康熙廿七年誰知
今日逢離亂。我思龍蟠山側鄂王城。陶侃當年擅盛名。
移軍沔口。烝徒戢問柳西門。都尉驚風月登樓。猶似昔
蚍蜉撼樹。竟傷情。豈無帳布分軍士。坐使銀山陷賊營。
莫上棗亭高處望。蛟鼉從此激江聲。

初泛新安江

千巖萬壑煙霞掃。舟泛青溪覺溪好。蒼蒼空碧不見人。

但聞樵歌出林表。輕雲寂歷依長松。頑石何情却生草。
峭壁能留太古春。流水白雲相對杳。神仙洞府不可尋。
定與紅塵隔昏曉。斜斜灘樹招我前。一片殘陽倚霜老。

謁海公祠

溪南山石峭。廟貌自凌烟。境尙孤高託。人懷蹇諤賢。寒
松盤絕壁。俊鶻翥雲天。朔望朝廷禮。焚香敢告虔。

天開青溪雜詠

水爲灘多作旋流。碧雲揉碎鏡中秋。往來畫楫停橈間。
何處天邊風露樓。

雪門詩草

卷三
高日集

八

巖巖遍岸挺孤松。石礪流泉巖下衝。雲碓不知人已去。
夜寒猶向月明春。

天開黃岳白雲移。箬密林深野卉滋。深羨東風留舊蹟。
梅花香到賀侯祠。

蘿雲箇露鎖青鬟。白雉千年竟不還。短笛橫吹天欲暮。
夕陽紅上小金山。

留別青溪

江皖既失杭城戒嚴省
中調瑤協防因而去任

來時雪凍去時消。縮綬青溪六十朝。修到梅花應有福。
喜看宿麥漸生苗。地隣宣歙烽煙警。歲值災荒井里凋。

撫字未能防禦短。匆匆春水送歸橈。

春感

湖湘事繁。朝廷慮賊下竄。命江督陸爲

欽差大臣進防皖鄂。江督調兵三千守武穴之

老鼠峽。繼親率淞江提標兵二千由水路進駐

湖北廣濟之龍坪。檄壽春鎮恩長督舟師至老

鼠峽會防。未及登岸而舟師潰。恩長投水死。陸

師亦潰。江督自龍坪退。賊掠九江而下。二月十

七陷安慶。巡撫蔣文慶死之。江督復率廣艇及

雪門詩草

卷二

高日集

九

舢板船以防蕪湖之東西梁山各兵亦不戰而潰。遂回城自守。正月廿六日。福山鎮陳勝元迎戰死之。藩司祁宿藻嘔血死。二月初十日。儀鳳門地雷發。我方禦之而賊已越三山門入江督陸及提督福珠隆阿上元縣劉同纓死之。在籍前廣西巡撫鄒鳴鶴前處州鎮湯貽汾均殉難。越二日。滿城破。將軍祥厚副都統霍隆武死之。向帥追至九江。無船不能渡。咨江西撥漕船始東渡。二十一日。至金陵。結營於孝陵衛而城破。

已十一日矣且賊卽於是日陷鎮江廿三日陷揚州揚有富民江壽民贖金賄賊約不相犯賊僞許之旋掩入壽民縊死賊旣得揚鎮乃分據浦口瓜州以斷南北之路北防始警而我浙亦於甯國徽州設防當岳州旣失上禱徐廣縉職逮治而以向爲欽差大臣向鑄滅此朝食四字於關防側可謂壯矣後守孝陵衛以墮蘇常不爲無功第在永安主圍城缺一之說長沙札營岳麓又不斷龍飛潭之水路致賊得兩次

雪門詩草

卷三

蒿日集

十

竄出由十月廿日長沙解圍至正月廿六不滿十旬而東南大局全壞此中自有天意然以人事論吳兵柔脆金陵無不失之理江督殉城無慙守土惟遽進遽退稍形不決而尋本溯源其失機固不在兩江也

浙東飛雨已愁人。警報金陵倍慘神。已失上游無皖境。可能羸卒控江濱。秦淮花月憑誰主。鍾蔣煙雲竟不春。虎踞龍蟠費惆悵。六朝都建是何因。秣陵回望洞庭湖。萬里煙波萬里圖。粵事得人甯至此。

湘○中○失○策○遂○長○驅○十○旬○竟○壞○東○南○局○耦○國○深○愁○古○帝○都○
柔○脆○士○民○金○粉○地○青○烽○碧○血○共○模糊○
滄○海○茫○茫○起○暮○愁○潤○州○北○望○見○揚○州○隋○家○璧○月○迷○春○霧○
南○渡○金○山○入○亂○流○鐵○甕○潮○來○城○欲○動○瓊○花○雨○打○苑○如○秋○
東○風○似○虎○真○無○賴○覆○盡○邗○溝○一○帶○舟○
由○來○天○目○出○黃○山○歛○水○宣○城○咫○尺○間○三○月○春○連○兵○氣○動○
萬○家○愁○見○陣○雲○環○西○湖○花○好○疑○無○奈○東○浙○潮○生○未○等○閒○
吳○楚○一○時○同○告○急○深○憂○宵○旰○感○龍○顏○

清明遊桐邑北郭獅谷庵書悶

雪門詩草

卷三

蒿日集

七

浙○東○三○度○過○清○明○今○日○清○明○倍○不○情○江○上○鼓○鼙○連○海○雨○
故○園○荆○棘○滯○春○耕○愁○看○麥○飯○歸○思○切○怕○對○梨○花○白○髮○生○
出○郭○偶○尋○獅○谷○寺○石○泉○深○謝○老○僧○烹○

春暮

海○雨○送○殘○春○宦○游○驚○候○改○三○月○夏○序○交○誤○認○青○陽○在○卧○
闌○子○規○聲○知○春○不○留○待○起○步○小○池○閣○茶○靡○餘○蓓○蕾○煙○中○
卧○薔○薇○附○萼○殘○紅○餒○胡○蝶○慵○不○來○香○盡○瘦○蜂○腿○看○花○事○
已○闌○想○花○手○承○頰○今○年○春○豔○遲○寒○較○去○年○倍○我○謂○寒○留○
春○那○知○被○春○給○寒○去○春○已○深○誤○度○春○應○悔○尚○憶○芍○藥○枝○

雨中錯鮮采。隨雨忽飄墮。滿地胭脂海。開謝轉瞬間。東風如傀儡。留春惆無策。嗔春春豈罪。且攜白玉壺。餞春每日每。

桐江僑寓春暮雜作

欲歸歸未得。暫住住何心。道路江湖阻。烟花澤國深。灘聲添夜雨。海氣變層陰。春暮鄉思切。啼鶉那更禁。縣小城依岸。人家半住樓。窗開延暝色。笛起隔春愁。遠嶺雲明暗。長江月去留。閭閻宵柝警。多難繫時憂。西郭圓通寺。山門日寂寥。深松疑木魅。古洞宿雲妖。殿

雪門詩草

卷三

蒿目集

十一

濕苔侵佛蕪。多路沒樵流。連姚墓側。石馬認前朝。爲報金陵失。兵船日日過。水郵增縣累。官渡聚人多。續調漳汀士。前程富渚波。長江舊天塹。克復待如何。草木長烟霞。桐山舊種茶。上珍歸海舶。餘利普農家。兵昨江淮阻。船知滬瀆遮。春深番賈絕。村姥坐咨嗟。最愛嚴陵樹。頻來問釣磯。江分山欲合。魚靜鷺還飛。石壁雲依漿。灘聲水濺衣。歸舟迷去所。四面翠光圍。香豐芹泥濕。飛飛海燕斜。主人原是客。小住各成家。薄暮重簾雨。春風一苑花。江南王謝宅。祇合集昏鴉。

昔到初臨政。今來不爲官。紳耆猶薄餽。胥吏感前寬。愛
筍宵沽酒。看花晝取歡。無須談戰守。袖手已旁觀。

新安江夏泛

莽莽江光出翠微。天長雲暖一帆歸。盤紆石壁行人少。
寂寞叢祠夏木圍。白鷺忍饑臨草立。蒼鷹含怒鬪風飛。
清時不遣豺狼肆。底事猩猩叫落暉。

重至青溪

水曲風難任。春歸鳥不鳴。青山如我識。官灞爲誰清。客
聚收茶候。農忙打麥晴。海公留惠政。重到不勝情。

雪門詩草

卷三
高日集

十三

不見粼粼石。江流夏漲黃。野祠樟葉綠。村店橘花香。地
僻閒雲古。舟遲白日長。薰風能解慍。琴軫不須張。

舟中夜坐

溪長村店稀。扁舟伴孤嶺。明月注涼波。萬籟闐已靜。輕
烟蘿壁生。空翠詩心冷。天搖珠斗光。潭宿閑雲影。草香
和露來。寂寂中自領。逢窗一燈明。投光紛蚱蜢。篙師醉
卧熟。良夜迢迢永。更無更柝喧。惟有流泉警。

四月

四月西風爲麥秋。輕寒猶自擱江樓。水侵汀草魚兒出。

雨濕林花燕子愁。瘴海未平煩虎旅。嚴陵小住戀羊裘。
家書昨到催歸早。不信輕雲被樹留。
銀箏繞郭不堪聽。攜酒還登擁翠亭。江水漲黃溪水綠。
遠山含碧近山青。尚留杜宇啼烟樹。已有鱗魚問畫舸。
回首春風向何處。楊花都作富春萍。

端午後到杭憑眺吳山茶肆寥寂書肆亦閉遠望

西湖畫船稀少山中祇練團勇時賊窺懷慶豫
章又復告警人心稍定而忽擾作詩感事

朱樓畫閣翠雲巔。遠納滄江鏡裏天。龍井價昂酥合貴。

雪門詩草

卷二

蒿日集

十四

餅師閒坐說前年。

吳越圖書海內藏。山中每到駭琳琅。慙余薄俸搜羅少。
今日徒尋舊賈坊。

草間螿斧奮輪時。驚起蟬鳴過別枝。古寺閒來僧卧熟。

高槐風定綠參差。

錢王獻土踞王忠。一塔微經倭火紅。自古杭州兵劫少。

歌樓舞榭尚雲中。

玻璃小舫曲城隈。油壁香車昨不來。休道荷花竟無主。
薰風仍傍御亭開。

六橋楊柳鬱婆娑。浸月垂虹寫翠波。莫更擡頭東北望。
汴池隋苑野鴉多。
魚擾西江水不清。犬牙東浙客心驚。炎風漸逼潮頭猛。
敢說錢塘一鏡平。
大觀臺畔夕陽斜。義勇人間靜不譁。乘得晚涼新月上。
綠沈槍怒舞梨花。

涼思

露下楸梧蟬漸嬾。秋回庭苑燕先知。西風不管征衣薄。
海角天涯夜夜吹。

雪門詩草

卷三

高日集

秋遣

鄉思西風逼。江城桂欲黃。吳雲依渚暮。楚水極天長。戎
馬書難達。田園露未荒。諸兄應念我。昨夜夢連牀。
晚稻猶懷澤。寒花半報秋。早涼風颭水。夕照寺明樓。燕
去堂偏靜。蟬催客易愁。不堪重屈指。四載已戈矛。
未報烽烟靖。飛燐奈爾何。征人同夜月。遠戍悵秋河。絡
繡驚寒早。啼螿觸夢多。誰家好庭苑。冉冉自笙歌。
驟雨深秋少。飛星涼夜稀。故人何日見。鄉國五年違。宛
轉商生事。浮沈辨世機。雲山未能買。慚愧碧蘿衣。

病瘡

秋興詩纔讀。西風瘡轉侵。炎涼片時事。去住五更心。暑濕登眠地。醫調置橐金。菊花應笑我。瘦骨共寄歛。

歸感

嚴陵山色欲留人。重重遮我還家路。歸心已逐鴈南飛。雨阻雲橫初不住。瀟湘明月憐我心。夜深來照桐山樹。桐樹翩翩黃葉飛。頭白饑鳥返哺違。青天修遠嗟何極。寒露淒清世已非。最是栖栖無母鶴。一聲孤唳總沾衣。

十一月十五日錢江高嘯琴赴官長沙由桐買棹

雪門詩草

卷三

蒿日集

其六

同行

雲歸楚岫月升岑。君是辭家我返林。一片桐君山下水。來潮去汐兩無心。

七里瀧

進瀧青山橫。更橫出瀧山。開灘忽迎幽。奇平曠極變態。往來太熟心。轉平東風一葉歸。帆輕上溯睦郡雙塔明。回頭下望嚴陵樹。溪山欲別還多情。招我白雲巖下宿。見慣沙鷗波間鳴。我度瀧中已七次。春鬟秋髻分陰晴。釣臺石筍拂竿處。蒼苔滑澗舟纜縈。薄宦時平適清暇。

頗○疑○天○意○多○曲○成○今○年○江○右○連○烽○火○當○軸○議○防○讐○置○兵○
古○來○管○鍵○重○天○險○山○川○難○與○人○謀○爭○此○地○受○束○金○衢○水○
萬○派○下○注○無○遺○傾○一○帆○直○達○錢○塘○城○一○舟○橫○扼○無○奔○鯨○
積○巖○碧○嶂○鬪○劖○削○盤○鬱○何○但○宜○釣○耕○欲○持○此○意○問○山○精○
山○頭○墜○石○如○破○罌○低○徊○我○識○山○靈○意○長○江○采○石○今○難○衡○
蓬○窗○默○倚○舟○忽○轉○舟○中○已○熟○鱸○魚○烹○且○沽○美○酒○看○山○去○
重○來○誓○結○烟○波○盟○

過大洋灘有懷于少夔水部

青○青○灘○上○山○山○下○排○紅○樹○繞○樹○雲○屋○連○故○人○居○此○處○京○

雪門詩草

卷二

蒿日集

七

華○事○宦○游○三○年○隔○塵○霧○想○像○夕○陽○中○停○篙○不○能○去○

蘭溪

雙○溪○繞○城○西○洗○我○明○月○朗○郭○外○沙○棠○舟○玉○人○盪○蘭○槳○紅○
燈○水○上○光○綠○髻○烟○中○晃○潛○魚○戀○清○歌○宿○鷺○警○爭○響○迢○迢○
良○夜○深○月○送○游○人○往○

舟中有懷湯溪宰阮範書

灘○行○舟○日○遲○宛○轉○清○溪○曲○溪○流○太○無○情○不○照○故○人○綠○
人○前○山○中○懷○抱○溫○如○玉○浮○雲○隔○河○漢○咫○尺○不○相○續○何○當○
夢○寐○間○話○別○翦○窗○燭○

舟漏

猛風吹帆欲破。小舟不禁狂浪大。浪頭灘石排森森。
噴沫飛濤肆顛簸。篙師失手中。船漏一人驚呼衆聲和。
衣袂未戒滿舟沸。藥裹書籤半污漉。船頭危立招手前。
幸有同行舟可過。妻孥失色面如土。驚魂稍定神還慄。
惟有赤子天真全。乳媪懷中眠紫襪。須臾彌隙仍登舟。
遇危得拯羣相賀。不驚不喜我坦然。自攤襪被尋一卧。
君不見今日汪洋巨海中。折檝摧帆又誰個。

行抵常山

雪門詩草

卷二

高日集

十六

浙山行已深。浙水寒碧沈。浙雲遠相送。遙傍丹楓林。沙
棹泊星渚。時聞爭笛音。隨風度遙思。和月清塵心。明朝
過山去。舊夢遯難尋。

過山輿

香油綠轎兩杠橫。顛簸如舟浪裏行。一路青山應笑我。
詩情搖蕩不分明。
旁見兜輿緩緩過。平扛松下兩肩馱。澤車款段生平願。
傾跌從來駿馬多。

過廣信

午夢落灘聲。舟過廣信城。水歸彭蠡澗。山近豫章平。野
牧誰增壘。江湖尚用兵。浙常嚴鎖鑰。秋末此屯營。

弋陽道中

林樹重寒翠。沙岸積霜白。曉風送行舟。已過弋陽驛。灘
密水磴鳴。洲澗江路窄。時危守險殷。處處見水柵。水柵
日以高。波濤日以逆。中原未罷兵。愁煞江湖客。

吳春貴溪曉望

木葉飄未盡。冬林依舊紅。我來貴溪曲。霜晴曉無風。推
篷眇朝霽。旭日澄波中。灘路碎石潤。村墟微藹濛。轉郭

雪門詩草

卷二

高日集

十九

紅寺敞。斷港危。橋通野人收。晚竇童稚割肥菘。宿臆凍
未散。啞啞寒蘆叢。干戈擾旁邑。此地仍熙豐。仰首祝蒼
昊。眷我吳江東。

見安仁修城作

頽城生翠蘿。新城赭又多。隔江開赤石。逼岸堆嵯峨。千
夫待畚揭。日夕聞謳歌。歌聲入雲碧。木落潯陽波。上游
重設險。下瀨誰橫戈。縣邑今若此。都城將奈何。安仁屬

饒於秋
末失守

曉渡彭澤

日隱東南曉霧黃。湖天萬里混茫茫。洲無叢荻猶棲雁。
浦有漁舟祇載霜。樵舍勲名歸勝代。孤山管鑰鎖潯陽。
王師未報清江左。田鎮諸軍敢撤防。

嗔色

嗔色入扁舟。舟中人自愁。疎星微隱樹。遣火欲明樓。詩
思和鐘盪。鄉心與雁流。客程無定宿。霜夜泊蘆洲。

暮泊滕王閣書感

五月賊遣胡以晄犯桐城破集賢關再陷安慶
別遣賴漢英石祥貞攻九江湖口進撲南昌時

雪門詩草

卷二

高日集

二十

江忠烈任湖北臬司奉命將赴江南行抵九
江聞警卽赴南昌會同巡撫張防勦連戰勝之
六月初二賊以地雷轟缺得勝門月城楚勇力
堵得全七月吉安土匪蠭起湖南遣兵五千援
江復遣兵解吉安圍平太和安福之賊遂於二
十日均逼南昌易良幹楊虎臣陣亡而賊被援
師所挫實甚於八月二十二日解圍去陷九江
上犯湖北總督張飭糧道徐豐玉漢黃德道張
汝瀛會同知勞光泰率砲船至田家鎮編筏橫

江以截逆舟九月十三日江忠烈由瑞昌興國
越至鎮而賊已上踞半壁山乃嘆曰天險已失
可奈何謀以次日移營羊角山而日晡會食賊
船上駛山賊以砲下擊防兵多逃砲船遂潰江
忠烈率鶴麗鎮之兵突圍搏戰徐豐玉張汝瀛
直隸州李棟知縣杜文浩陣亡遂陷黃州知府
金雲門死之繼陷漢陽知府俞舜欽知縣劉鴻
庚死之分陷孝感應山以上犯德安經官兵遏
之賊乃退黃州此南路軍情也賊陷金陵後繼

雪門詩草

卷三

高日集

五

陷揚鎮護理漕督楊 欽差大臣琦直隸提督
陳金綬內閣學士勝遏之而林賊鳳祥李賊開
芳四月窺入滁州踞臨淮關陷鳳陽入河南之
永城另股賊吉文光出浦口入亳州以相合五
月初七陷歸德遂由睢州甯陵杞縣陳留於十
三日撲開封省不能入乃由朱仙鎮走中牟入
汜縣在鞏縣搜煤船以渡黃河分擾鄭州滎陽
六月初二圍懷慶府知府余炳燾知縣裘寶鏞
堅守破其地道而學士勝之兵亦繞道至其訥

爾經額所統之將軍托明阿提督善祿都統西
凌阿雙誠暨前尚書恩各兵俱集山東巡撫李
恭毅亦出境相援扼其東北之路賊不能破於
七月二十八遁去由太行小道窺入山西之垣
曲縣河東道張錫蕃知縣晏宗望死之旋入曲
沃踞平陽府直抵洪洞 上震怒奪訥職及山
西巡撫哈職而以勝爲 欽差大臣賜神雀刀
已而賊東窺犯屯留潞城入直隸境踞邯鄲縣
北之蹄洛關遂至深州 上命惠親王爲奉命

雪門詩草

卷二

蒿日集

五

大將軍科爾沁郡王僧爲參贊大臣督兵會勦
賊棄深州直走天津經官兵敗之遂踞靜海分
屯獨留楊柳青等處此北路軍情也憶賊之初
入湘也以天下之兵餉防湘而不足至今年南
北俱警各自爲謀軍餉之絀與賊勢之猖獗莫
盛於此然曾文正公以侍郎墨經興戎謂兵多
游惰不如招農民以爲勇遂定湘營之制以長
江旣失非砲船不能肅清乃創建水師駱文忠
之撫湘也以分疆自守不如出境勦賊於是始

援江西繼援鄂省是楚軍東征之始基也江北
雷以誠以民財既竭籌餉維艱於仙女廟開辦
釐金各省仿行遂奏飽騰之效北路將帥磨厲
有功講求堅壁清野之法疾甚則智慧生成
法窮而權變出三年求艾有志竟成謂非中興
之轉機哉有心時事者慎毋輕忽視之耳

悔不齟齬作序游年來兵燹祇添愁青霜紫電何人佩
畫棟珠簾一炬休吉贛南流妖霧合匡廬北峙暮烟稠
殘磚滿地遺碑失且把閑情問夕鷗

雪門詩草

卷三

蒿日集

三

遠水殘霞瞰綺窗洪都控制舊名邦窺垣蟻垤隄徒潰
射斗龍文夜未降天塹問誰頻失險彭湖何事漫通江
舟人指點磯頭望掠盡吳西小畫艘

江邊誰放呂嘉船短域銜沙射滿川祇道飛軍宜塞港
可能誓衆共投鞭黃旗浦口無關鍵白櫓荆門竟接連
想像雨花臺畔路官軍深壘駐經年

危城三月固金湯郛外燒痕認夕陽旁邑那防蹂躪苦
軍輸不覺調庸忙功歸組甲來吾楚勝決重帷仗子房
獨恨餘氛猶未殄關河北望淚沾裳

秋末賢王出帝都。朱輪黃帶玉麟符。營開驃騎燕雲
卷。劍仗龍文華嶽趨。河北諸君懷挾纜。江南士女備篋
壺。封狼野豕休猖獗。會見長驅定楚吳。

傳語丹書下鳳墀。舟師募領起吾師。儒臣重作長城

倚報國權教墨。經垂米賊馳驅彌敷澤。習流早晚扼江
湄。荆襄繫念頻惆悵。暮雨西山向客悲。

回首長沙見白雲。去秋消息實難聞。閭閻同此遭遷播。
義勇何堪更掠焚。一道攬槍連軫翼。兩年鄉淚挂榆枌。
豫章烽火南風煽。料得重驚楚上軍。

雪門詩草

卷三

蒿日集

十四

宦游我昨浙東歸。到此鄉關路已微。懶買花瓷供煮茗。
試炊吳粳暫充饑。西湖有夢寒梅放。南浦關心一雁飛。
幾欲登樓無處所。自憐王粲賦心違。

麻陽花舫行

豫章江口楓葉丹。扁舟小槩江風寒。旁有麻陽數花舫。
鄉音入耳驚相看。黃面梨凍衣裳薄。馬頭空坐無盤餐。
兵火乍退客宦少。何事來此彭蠡灣。自言楚督家新建。
前年春駐衡陽縣。十萬貔貅扼上游。策馭居中防粵甸。
此時湘水尚安瀾。此船僱送官人春。比到西江風信非。

洞庭南望秋酣戰。晒晒遂泊滕王閣。指望家鄉傳定箭。
那識長江惡浪橫。今年兵到南昌城。官艘民船付一炬。
此勝幸避能逃生。玻璃窗破無錢買。潯陽江上少人行。
大宦還家擅華屋。流離我輩隔歸程。言罷江潭波自湧。
西山南浦動愁聲。

頑婢歎

莫采薔薇枝。枝底刺披離。莫種馬勃草。草臭不可道。
頑僕尚可遣。頑婢不可收。薄愬不聞泥中詠。善啖惟與肉。
食謀斷我麈尾柄。碎我碧玉甌。翻我兔兒羹。汚我翠雲
雪門詩草

卷二

蒿目集

五

裘稍助指臂效。時貽覆餗憂。逐燕欲下珊瑚鈎。失巢窮
鳥無林投得奴。使替奴愁家室區區尚如此。滔滔宇宙
君何尤。

鷓鴣詠

生來不食漁翁粟。織鱗自啄充饑足。出入寒波動波綠。
月明長伴漁舟宿。漁舟來往無西東。竹竿籊籊朝陽紅。
心閒不逐浮雲蹤。大魚啄得歸漁翁。

霧

扁舟無去路。四面已迷山。料不成雲雨。因何遍宇寰。曉

看驚袖濕遠戍悵旗殷怪爾蚩尤誤終消赤日間

星

白倚雲霄勢長年氣似珠郎官空應宿上將不彎弧漸
覺飛流速能成經緯無何時方朔奏紫極太階符

霜

已經秋氣厲大地盡飛霜河畔驚沙白江南細柳黃甲
綿長怨冷荆棘未全傷初六堅冰戒韋編玩不忘

月

賴爾清輝朗宵行路不迷雲山都入照烏鵲敢驚啼圓

雪門詩草

卷二

蒿日集

三

滿重霄澈高寒萬象低經霜佳仍翠伐木斧空携

雁

鄱湖纔水宿衡岳又雲征處處驚增繳飄飄少定程關
山書未達雨雪陣難成塞北春沙暖携雛足此生

鴉

驟聚真鳥合遙看竟作團天寒依楚幕雨急繞風竿古
戍飛騰亂空林哺待難至今懷亞子鴉陣獨登壇

狐

菁密林深處於今嘯聚多聽經工蠱惑健走竟蹉跎月

黑風生穴。水寒夜渡河。蓬蒿依自恃。獵火已山阿。

鼠

辛苦閭閻粟。官倉待餉軍。攀援來爾輩。耗窈竟成羣。食
麥今三歲。成裘祇外文。銜蟬思欲聘。憑社問誰熏。

卧起

未知行幾里。夢醒已帆開。濛白日含檻。橫青山在杯。人
聲傳市近。水語覺風來。回首彭湖遠。雲邊一雁回。

夜泊豐城

緯夫曲曲足盤跚。風逆方知上水難。愛月不教遮葦箔。

雪門詩草

卷三

高日集

三

避囂翻喜泊蘆灘。人行石塹荒燈暗。鳥下沙隄古樹寒。
長夜龍光杳何處。坐看南斗自闌干。

臨江食柑

繞岸人家盡種柑。齊齊霜葉染如藍。甘寒沁入詩脾爽。
恰有山童摘滿籃。

小泊桐江貢使船。貽予福橘記前年。品題臭味差池少。
慙愧無因到御筵。

產出温州秋後腴。沾牙似此冷香無。年來嘗遍吳中味。
雨露雖同醞釀殊。

黃瓢手破洞庭霜。留貯春風得飽嘗。斗酒流鶯湘上柳。
教人那不憶家鄉。

寒雨

匡廬寒雨過江橫。雲重風迢舟怕行。歲晏天應含雪意。
途長人尚望冬晴。川原野麥敷青淺。村落炊烟濕翠生。
去臘梅花峰下路。一篷涼月壓詩清。

新喻以上溪山幽峭卽目偶成

飛鴻別浙西。飄忽已千里。西江足清波。西山空暮紫。轉
盼蒼翠來。照耀清心髓。幽峭不可名。宛轉隨舟子。綠霧

雪門詩草

卷三

高日集

五

石上生白鶴。松間起人行。紗籠中泉落。丹靑裏對此憶。
浙山烟景還相似。飄飄兩髻風。冷然復心喜。

枕上

一枕閒情夢未圓。蓬窗微透月娟娟。水車雲碓淒清轉。
各助灘聲警客眠。

浣女

高髻盤雲髻。貼鴉荆釵裙。布野人家。浣餘竹徑匆匆去。
那管溪邊風浪賒。

分宜卽景

山翠添薄暮。溪光澄雪天。臨江多古樹。樹樹生寒烟。欲問前朝事。鈴山何處邊。入夜擄歌歌。危灘咽石泉。

袁州山岸種茶極稠。歲暮不凋。頗助山色。

一帶寒山翠。人家盡種茶。春風多采掇。小徑尚橫斜。不墜霜中葉。微開雪裏花。何徒供飲啜。深足壯烟霞。

曉起

曉起瀟清神。迎眸景若新。叢篁烟散曙。弱柳岸先春。露重行人少。沙鳴一鳥晨。靜觀都自得。和煦卽天真。薄醉消豪氣。低吟勝浩歌。濛濛山自遠。澹澹水微波。高

雪門詩草

卷二

蒿日集

无

樹含雲靜。遙村帶霧多。炊烟幾家碧。歲熟識民和。休道寒光慘。天心蘊釀深。暖泉生暗徑。細草茁遙岑。日出平原淨。風微衆籟沈。此中有真趣。不必撫瑤琴。試取梅花嗅。寒梅漸有香。春心冬已抱。道味澹誰嘗。浸水石氣碧。經霜竹節黃。輞川詩思遠。孤鶴唳朝陽。

歸途雜紀 十四首

三千歸路遠。五載宦情迂。明月還臨楚。浮雲暫別吳。倩人求浙產。防客問西湖。自笑春風返。梅花尚沒鬚。繚繞山還水。舟車况瘁多。僧牙欺過客。盜賊借風波。灘

涸冬膠漿霜嚴冷透鞞仗余詩膽在隨處得安窠
楊葉小輕舟鄱陽一夕留湖開風力勁水濶月光浮
戒夜頻燒燭微眠不脫裘曉來汀渚望穩宿幾沙鷗
紫邏雲山繞南昌乍解嚴旌旂飄列雉關牡靜明蟾備
豫郊增壘兵閒稅察鹽淮陽不通久淡食得無嫌
景德官寮閉紅瓷價漸昂部燒嗟巨賈路斷少行商
遠渚寒莎綠頽垣舊石黃村民猶按堵野麥曉含霜
漕艘無多泊風聞半掠焚瓜洲知不渡粟泛且儲軍
改折權宜計飛芻調發文轉思三滬擾浙運又難聞

雪門詩草

卷三

蒿日集

三

爲惜瘡痍甚蠲除帝詔頻閭閻深感泣倉貯少陳因
且喜豐綏屢潛培國脈伸義民應踴躍助餉莫言貧
怪爾妖氛肆黃州又往還廬滁堪避地彭澤有孤山碧
蒹沙汀闊丹楓埃壘環難平真事勢搔首望江關
暫喜簪纓卸難將意氣除見人頻問戰考古恨無書一
路雲山濶長年堵塞餘西江風月好自在羨樵漁
自到宜春後湘雲遠見迎溪清來女浣山峭少人行歸
夢殘年數鄉音近里平不知吳楚會還復問前程
共道瀘溪涸還須換小船持篙時測水倚劍坐看星墩

火沈宵紫。雀烟入暮。青關心沙上雁。生恐是原鶴。
日日探幽趣。行行尚異鄉。冰寒朝躍鯉。雨過夜聞鷓。瀟
水增民利。煤山發地藏。生涯隨處是。何事怨穹蒼。
小女舟居久。篷窗戲夕曛。醉鱗者最佳。求舊味野菘怪。
香芹食此。倚毋微驚浪。俛予共看雲。見山頻索問。總
說是桐君。不指雙溪風。交蕭瑟。欠兩人商議。
觸目風霜緊。吟詩且自豪。雀巢迎日暖。雁陣背雲高。舊
侶懷銅渚。新篇玩錦韜。茫茫千感集。彩筆莫辭勞。

萍鄉登舟

雪門詩草

卷三 蒿日集

三

船是故鄉船。水是故鄉水。日夜入湘流。送人還舊里。舊
里別時多。昨來人荷戈。遙想淚猶墮。觸目當如何。鄰舟
是阿誰。知我還鄉客。爲語瘡痍情。邀僕話終夕。銀燈照
水青。坐久不能聽。溪風夜蕭瑟。吹雨入窗櫺。

灘石詠

山石多壯岩。阿水石多生。風波馮夷未。掃童律惰篙師。
欲渡其如何。排牙向人含。怒態非虎非豹。非蛟鼉大舟。
趨起進復退。小舟旁睨愁。嗟峨橫亘直。豎蒼赭。雜岩懸
峽窄。森兵戈。後灘歷艱險。前灘復紛羅。片雲不吐腹。無

玉○要○津○扼○踞○空○盤○陀○小○石○助○勢○大○石○橫○詭○波○出○沒○狀○猶○
猗○猗○淨○尚○可○隱○伏○懼○我○細○膩○風○光○劍○戟○藏○寄○語○同○舟○休○
振○柁○

入長沙界

冬○溫○遊○子○心○徒○切○月○照○行○囊○夢○自○清○莫○上○定○王○臺○上○望○
寒○雲○風○木○古○今○情○

除夕到家寫悲

故○國○幾○無○國○殘○年○不○當○年○卑○官○違○白○髮○佳○節○隔○黃○泉○隴○
艸○冰○霜○斷○粉○榆○劫○火○鮮○屠○蘇○是○何○物○一○奠○淚○漣○漣○

雪門詩草

卷三
蒿目集

三

生○兒○生○季○子○兒○長○已○親○顏○婚○配○隹○勞○具○詩○書○遠○宦○媒○么○
雛○彌○撫○愛○晚○稻○竟○虛○栽○痛○絕○春○風○返○護○花○不○復○開○

雪門詩草卷四

嵩目集

善化許瑤光雪門甫著

甲寅年

廬州從軍詞

卒有從廬州營歸者為錄其語

征人有底苦。三年淝水城。江花。俱戰場處。處還牽情。笙歌暖鋒鏑。醉殺葡萄觥。戰功愧未立。性命固自輕。夜深征婦月。何事照官營。

驅馬出期門。道逢睚眦者。寶刀躍鞘出。白氣散原野。直中要害地。血濺靴袴赭。死者他旗頭。狼鬪誰寬假。歸來

雪門詩草

卷四

嵩目集

語同隊帳中笑。微咳

昨日鹽銀下。相期決一戰。浮雲敵壘深。堅壁不得面。狹路采樵徒。斬馘乘茲便。摧奔薄賊壕。鼓震山岳顛。回看都護官。斜勒腰下箭。我輩本無賴。落拓江與湖。躡足行伍間。犒賞饒金珠。身世賭鋒鏑。金珠何區區。夜闌更燃蠟。倚地博樗蒲。空囊餘戰塵。火伴急追呼。出營避何處。一騎敵壘隅。軍令不終肅。軍情難禁輸。

枯楊歎

善化許瑤光雪門甫著

枯楊偶生華。春風意自得。轉笑松柏姿。孤直少顏色。何人構大厦。誤效棟梁職。亦知勝任難。戀此丹雘飾。丹雘豈不榮。風雨竟傾側。飛燕雀。傳休向此間息。
疑曉仙謠。諷京秩紛然乞歸也。

瓊仙曉入玉霄宮。攀龍附鳳凌虛空。竊飲丹泉還綠髯。俯爨瑤鼎生方瞳。吹簫巧博玉皇喜。金盤下貺蟠桃紅。瑤簡琳書掛名字。須臾意氣參長虹。袖中青詞字字寶。揄揚帝德垂無窮。自謂千秋億萬載。紅羊銷劫天無功。棊星一夕耀。白紫庭吹入黃沙色。丹霞紺露不敢餐。

雪門詩草

卷四
蒿日集

二

一點凡心。歸計逼。舊日桃源花未闌。仍尋漁父將機息。回頭上。峴官府。多寂寞。無人香案側。神仙狡獪慣。保身林密山深。安樂國。金童含笑問。重來東海波。平桑椹。黑紀異。
上年十月十三日酉刻。湖湘雨黑。子形如疏。豆中黃而潤。惟混沌無辨耳。雞食不化。多壺。死聞江南一帶。皆然。兒輩拾而留之。歸家見異。爲紀以詩。

襪祥終莫辨。黑子雨紛紛。圓潤差如豆。生成欲問雲。天田甯有種。兩粟匪虛文。無襪陰陽錯。含滋內外分。人間驚鶴髮。地面駭雞羣。舊事元書紀。訛言楚語殷。長江兵鬪格。兩日氤氳殺氣干。和氣傳聞豈異聞。不過垂法。

戒○豈○盡○應○妖○氛○拔○木○成○周○室○祥○桑○奮○武○君○古○今○同○揆○節○
朝○野○一○憂○勤○災○異○誰○條○疏○悠○然○對○夕○曛○

弔儲牧功

窮追過二月十二日賊逼甯鄉牧功力戰却之
窮追過伏受創陣亡牧功甯鄉庠生人

稱爲猛子敵方張遠失壯士
滌帥哭之慟湘人亦哀之深

儲君儒生耳報國勇無懦戰捷轉隕身鴉死明珠破紅
巾未滅失義士督帥淚湧輕裘流瀉曲從今碧水流渡
河○夜○呼○聲○大○

邨居

避世知無地。僑居且遠邨。雲山春色早。鄉曲古風存。室

雪門詩草

卷四

蒿日集

三

小喧兒女。朋稀罷酒尊。夜深忘世變。蘿月挂當門。

變○久○心○翻○定○山○深○信○總○難○連○城○頰○破○碎○無○水○不○波○瀾○草○

長重湖亂花開。楚國寒喜聞修戰艦。元老獨登壇。

兩○次○停○鄉○試○英○材○仕○進○稀○年○華○離○亂○過○生○事○讀○書○微○水○

定知魚隱。林深看鶴歸。從戎還幾輩。姓氏許騰飛。

寂○靜○從○吾○好○交○游○足○野○人○橫○雲○長○抱○嶺○獨○樹○自○成○春○雨○

過緣生菜。日高黃晒薪。不因避烽火。那遂此閒身。

遇鄭南橋談去年避亂事

赴○鄂○去○長○沙○移○家○轉○喪○家○孤○身○離○虎○口○闔○室○吮○狼○牙○天○

保鄉圍土風撓異地花吉凶如轉軸失計不須嗟
投水水中呼尸多水不濡未能裁性命枉自冷肌膚聞
語方痴立回頭被脇驅今朝得生遂轉覺淚沾襦
再談某貴公子避亂事
生平席豐厚寇急想尊榮水驛無裝艦全家不出城膏
梁殘骨月烽火尚驕橫粉鏡從容玩淒涼共此情

石馬哀 愍死殺也

二年七月賊由醴陵犯長沙官兵尾其後前途
各邑均倉卒失守文報多遲而偵探之確者謂

雪門詩草

卷四

蒿日集

四

賊將至官轉戮其搖衆比醴陵已失乃謀營於
城外之石馬鋪各將無敢出者羅文僖曾官陝
西與新到陝安鎮總兵福誠金塔寺副將尹培
立有舊商請出扎福與尹遂慨然於廿五日營
於石馬鋪鉛藥尚未發也廿七夜賊襲營福尹
二將俱陣亡敗兵被血走城中乃知賊至始閉
南門羅文僖方外勘土城繞西門乃入向使無
是軍城亦被襲矣尹尸得於櫟樹下逾旬而面
如生後福諡壯武尹諡簡毅

步出南城見石馬。雨淋日炙碑亭下。紫蘚斑斑戰血紅。
騰驤頗似勤王者。旁有牧童山下歌。似說前年爭戰多。
礫樹陰中雙將死。至今風雨樹婆娑。雙將爲誰福與尹。
霜氣西來健鷹隼。初到長沙卽陣亡。魂望長安應淚隕。
秦雲慘淡楚雲橫。承平世久不知兵。賊鋒已過醴陵縣。
大府安民民莫驚。比到背城君戰死。倉皇傳箭閉南城。
閉城守城城不倒。二將雖亡一城保。從此湖湘據上游。
援鄂援江致天討。英雄效命會有時。當關信是千城寶。
莫將成敗論功勳。君不見大纛峩峩秋色好。全師尚駐

雪門詩草

卷四

蒿日集

五

衡陽道

廬州失守江忠烈公死之感而賦此

吏材強之將長坂。驅耕牛將材強之吏。伏轅絆驂騶。與
失一賢城甯失一方州。忠烈馳騁材屢戰。奏奇猷。一朝
羈守土。舉步愁愆尤。飛棋著死腹。無復望回頭。待援援
不至。淝水化碧流。張巡障淮甸。賀蘭不同仇。唐室雖再
造。茲恨竟千秋。

荷錢行

田田新荷葉大如青銅錢。薰風識誰鑄。散擲溪河邊。溪

邊○漁○子○不○敢○弄○赤○手○歸○來○明○月○天○明○月○團○團○美○清○夜○如○
璧○如○盤○光○四○射○蒼○天○憐○我○瘵○我○貧○依○舊○傾○家○無○酒○價○牽○
牛○不○負○輓○天○駟○空○駢○駢○白○榆○歷○歷○仙○人○種○長○年○不○見○榆○
錢○飛○搔○首○茅○檐○空○太○息○量○沙○畫○餅○誰○是○非○

飛螢怨

太時有鄉民私集義勇意在投營羣疑不軌因而

罹法時事艱難固不可不慎也

飛○螢○不○自○量○深○夜○欲○助○明○月○光○主○人○懷○疑○認○狐○火○草○際○
可○憐○將○汝○傷○自○古○覆○盆○白○日○少○枯○楊○蕭○瑟○愁○人○腸○愁○人○

雪門詩草

卷四

蒿日集

六

腸○不○可○道○干○戈○滿○地○誰○能○保○不○如○歸○去○深○山○林○屈○蟻○藏○
蛇○多○壽○考○微○軀○粒○米○爾○何○求○短○箒○叢○蘆○秋○露○早○胡○爲○乎○
陰○風○慘○淡○削○地○來○坐○使○冤○憐○悲○白○草○

水軍哀

自四月初三克復湘潭七月十二水師進發閩

七月初二復岳州初三逆船自城陵磯上犯各

水師合戰敗之連日皆勝十六日山東登州鎮

陳輝龍順乘南風擊賊於螺磯不能收隊陳鎮

暨游擊沙鎮邦陣亡卽用道褚汝航同知夏燮

駛船往救亦陷賊中

賊船從北來。官軍自南擊。火毬已中賊。前鋒南風忽利歸。不及飛廉信。是濟惡臣陷。我忠良。三兩人。白波茫茫。杳無極。君山斑竹淚痕新。乃知水戰不與陸戰同。捩柁還營喜逆風。

水軍詠

江波催戰檠。去去不得留。前船方撥棹。後船檄催修。船中健兒好身手。以檠擊賊如飛猱。沈沈巨艦壓鼉窟。戰小舟隨輕鷗。連珠礮發敵膽落。水府無地藏蛟蚪。仁雪門詩草

卷四

蒿日集

七

見澄江右。卽看收石頭。瓦棺休恃黃花水。三楚從來踞上游。

江風吹面紫如鐵。江日爍肌肌碎裂。焚舟殺賊移營前。銅刀日煮波間血。輕橈逆擊怒濤開。誓與毒龍要一決。鎮船鐵砲如有神。轟敵一中每跳掣。可惜炎天水沸湯。江堤無處覓垂楊。沙場自古愁冰雪。江漢如今畏秋陽。秋陽雖烈誰敢怒。督師亦在官航住。砲擊敵得中。恒跳軍中謂之砲歡喜。

老農歎

驅犢下山來。老農倚門歎。新穀已登場。舊穀糶未半。湖

湘餘米向來多。陳陳紅腐奈爾何。年豐穀賤干戈阻。悔不佩刀空插禾。

遊官山寺三首

境僻登臨少。官山小寺開。入門風露冷。遍地長青苔。老衲燒茶至。松花落瓦杯。自言荒遠地。問客爲誰來。寺外多杉櫟。秋風斫短枝。樵夫荷柴返。山下夕陽時。暝色蒼然合。翩翩歸鳥知。獨有空潭裏。閒雲影未移。尋幽迷去路。逕小石橫斜。緩步待秋月。不知身到家。柴門墜黃葉。和露上輕紗。回首碧山杳。疏鐘送晚霞。

雪門詩草

卷四

蒿日集

八

乙卯年

戰船詠

長江旣失曾文正。修戰船以興水師。癸丑經其始。甲寅獲其効。至乙卯正月。挫於九江外。江與內江隔。而水師遂有內外之分矣。作戰船詠。

五溪蠻雲玉斧開。湘江流栉擁江迴。梓慶般輪鬪精巧。尋蛟磯怪驚疑猜。大者拖罟小快蟹。長龍遊曳波濤駭。其間舳板更輕迅。梅花海鷗同模楷。八槳凌波赤馬馳。雙砲壓船船不知。水犀就隊聽麾指。合肅昭潭龍窟移。

唐李齊雲何足數常侍火舫非吾師此皆橫流似奔電

一洗江甸清瘡痍自從去年秋風起甲寅七月十二水師由長沙進攻岳

州閩七月初初掃巴陵趨漢水武昌既復八月廿三日復武昌漢陽

黃州平楚望烽烟銷暮紫田家鎮是下江關賊壘雲屯

半壁山鐵鎖橫江拚死守岸頭鐵柱鈕重環游魚潛波

不得進江豚拜浪來復還我軍力戰麾船進斬關縱火

風濤震馮伯陽侯各効靈虜船千萬俱灰燼慘咽人聲

聽落潮謹呼軍氣仍堅陣十月初十陸師大捷南岸通

水軍遂薄江州郡洞庭既肅彭蠡清指日淮陽收重鎮

雪門詩草

卷四

蒿日集

九

那知彭蠡春風狂蕪城火箭燒餘皇內外昨聞江路隔

一條銀漢變紅牆天棊弧矢幾時見河鼓參旗望香范

勝負軍興古來有船上健兒休蹙首蜚霧曾迷涿野師

東風卒逐阿瞞走朝宗清晏會有期夜夜天船濟南斗

聞景州連鎮大捷正月初九僧王報捷時高唐餘氛南甯荏平賊勢已窮蹙矣

自擾河流北羈誅已二年臨洛開管鑰畿甸逼烽烟妖

鳥終投網飛蛾敢撲天春風馳奏捷一夜達甘泉

犄角高唐勢昨聞稍潰圍援窮知膽破鼠竄欲南歸禁
旅今乘勝游氛何處飛燎原衰草燄撲滅荷天威

北○紀○烽○垂○息○南○疆○虜○尚○橫○江○淮○懸○賦○額○郢○鄂○失○名○城○收○
復○需○全○力○殷○憂○啟○聖○情○安○危○天○下○計○何○日○武○功○成○

鄂雲愁

正○月○初○五○水○師○敗○於○九○江○江○北○廣○泰○復○失○督○師○
楊○由○黃○州○退○漢○陽○不○復○渡○江○保○鄂○以○防○北○窺○爲○
詞○又○退○德○安○山○西○撥○餉○陝○西○撥○兵○均○經○截○去○武○

昌○勢○孤○二○月○十○七○日○城○陷○巡○撫○陶○恩○培○投○水○死○

武○昌○太○守○多○山○巷○戰○死○

吁○嗟○乎○鄂○渚○頽○雲○頽○不○流○陰○風○怒○吼○天○人○愁○去○年○季○夏○

雪門詩草

卷四

蒿日集

十

冷○赤○日○初三月今○年○春○仲○翻○蛟○蚪○豈○無○羆○虎○下○游○扼○蜺○旌○

潦○倒○離○黃○州○義○勇○萬○人○空○擁○路○藩○籬○撤○盡○江○北○頭○項○刻○

霞○燒○半○天○赤○晴○川○烽○照○黃○鶴○樓○仙○人○遠○去○朝○北○斗○武○昌○

撩○亂○新○楊○柳○鯨○波○一○夜○對○江○迴○陶○侃○無○權○空○死○守○米○船○

已○被○他○人○留○銅○符○調○得○援○兵○否○海○倒○江○傾○莫○奈○何○君○恩○

未○報○空○回○首○碧○草○芊○綿○血○暈○新○江○花○二○月○不○成○春○同○時○

巷○戰○多○太○守○千○古○琤○琤○鐵○嶺○人○

健將詠

武○昌○既○陷○陶○文○節○殉○焉○是○日○黃○昏○副○將○王○國○才○

復麾兵入城斬殺無算及天明援軍不至乃開
南門整隊而出城卒陷

武昌城中有健將。鼻息鼓吸開江浪。金蛇掣電鎗法急。
狂虜退避精魂喪。鵬雲折翼陶侃死。君來救援城陷矣。
孤軍溷入黃昏時。鷗突殺賊賊不知。明月當天劍光碧。
腥風慘淡紅濕衣。春宵鏖戰苦易曉。收還重鎮明星移。
黃鶴樓頭看日出。準擬諸將相追隨。眼穿不見片帆至。
水軍倒向荆口馳。對江賊偵知我寡。狐渡蟻附仍登陴。
收隊出城豈得已。功成唾手旋失之。歸來大營見主帥。

雪門詩草

卷四

蒿日集

七

淚痕和血流雙頤

聽畢消齋彈琴

別君五載烽烟多。憶君西湖明月波。見君故山各驚歎。
聽君琴軫聲溫和。落霞遊曳度松嶺。閒雲寂歷橫岩阿。
歲月羲皇儼如昨。那知塵世還坎壈。人生感物異歡戚。
心平隨感無偏頗。憶昔浙東上虞邑。鳳鳴山畔飛泉校。
紫藤翠篠不知歲。中有碧雞鳴泉窩。土人謂非絲非桐
了莫辨冷然兩耳清。風過是時四明亦有警。而我到此
忘憂病。泉流禽語今何處。夢魂夜夜飛烟蘿。山水清音

口難喻聽君一曲爲君歌薰風螳螂向槐柯江潭魚龍
愁網羅携壺今日伴君醉醉倚琴卧拋金螺

賀聘臣同年由樊山避地來湘見贈奉答

已覆潯陽水上軍復傳黃鶴掩妖雲長江戰事方愁我
湘上僑居却到君故國田園春草蔓異鄉風雨落花聞
高歌白雪還哀郢慘淡離愁對夕曛

晴川閣下問梅花冷蕊寒香薄宦家玉笛正酣樓上月
銀山竟陷水中沙春歸絳幄悲鳴鳩江瑣青烽撲暮鴉
惆悵鄂雲開復合三年銅馬慣生涯

雪門詩草

卷四

蒿日集

十一

淹留休憶武昌魚水碧沙明且卜居紫燕定巢春社後
綠楊飄絮洞庭餘商量身世看長劍悵望關河恨羽書
携手麓峯指吳會愁雲深處六朝墟

蒼茫宦海盡迷津梓里言旋是棘人兵後故交多散佚
官界世態少相親逢君且話西湖月序齒難忘貢樹春
他日捲書歸棹去却憐元入失比鄰

顧復齋僑寓鄂城壬子冬城陷其室人羅投井死

室中女君子四人均殉難索詩紀事

江城鐵笛穿雲裂萬樹梅花冒妖雪梅花側挺女貞枝

可憐夜被繁霜折。一枝高折四枝隨。鐵質冰心萬古悲。
冽井泉清定誰汲。柔腸挽斷轆轤絲。轆轤宛轉情難道。
五溪猶憶仙雲好。羅辰州人仙雲深護酉山書。離女文明畫
卦餘。那知甲冑戈兵象。鼓缶焚如竟。突如烽烟滿宙烏。
誰屋尋得桃源問黃鵠。黃鵠磯頭妖鳥多。釀成鳳靡與
鸞吡。青萍血沈雙珠掌。綵索魂歸百結羅。惟有女嬃情
更烈。懷沙竟讀屈原歌。人生游寄浮漚裏。輕或鴻毛重
山峙。玉碎終難望瓦全。蓮花肯受污泥滓。千古文恬與
武嬉。貽誤只緣珍一死。我欲懷清高築臺。漢江尤霧不

雪門詩草

卷四

蒿日集

十三

曾開爲寫一門清。烈槩陽阿薤露郢聲哀。

李力帆舍飲佛臍茶

細雨花殘芍藥天。主人燒竹試新泉。佛臍捫得茶香古。
知是唐年是晉年。

十年曾讀鼠銜書。今日還添佛慧無。彈指清明春又去。
睡餘茶夢影模糊。

題東坡讀書圖

人生讀書喜穿鑿。數墨尋行道相望。豪氣一洗儒生酸。
惟有先生磨綺障。牙籤玉軸陳跡耳。茫茫烟海空惆悵。

我生類蠹食神仙好古終朝將古餉昨歲西湖作宦游
卷帙長拋抗塵狀六橋拜謁文忠祠紫髯蕭散西風帳
滄海蜉蝣變古今先生依舊書生樣堯宥臯殺想當然
羌無故實懷公曠讀書更不受書愚經術誤人復誰謗
君不見周官法變青苗錢太息當年神廟前

詠園中草木

楊柳

憶昔辭家時柳枝如我長別來五春風青雲不可量層
陰填屋角曲室生微涼植物有如此感之惜流光黃鸝

雪門詩草

卷四

蒿日集

古

繞枝語勸我進一觴霏霏昨日絮撲地今成霜青陽那
可負一醉聊自償

海棠

春風吹春雲片片落此枝老樹生嬌花未開已多姿出
手不忍摘蜂蝶撩相欺蜂蝶夜來散黃月光迷離及此
芳菲夕秉燭成幽嬉看花總虛幻惜花轉成痴美人期
不來閒園白露滋

薔薇

薔薇晚春花繁艷破烟碧含笑鹿籬間嫣然媚心魄妖

顏結主知頗不矜品格紫刺傷手多兒童慣晨摘年來
我欲刪又爲韶光惜尤物能移人俯仰悵今昔

山茶

凡花易開落山茶殊不然耐久鬪霜雪艱難胎隔年南
中牡丹貴此足增春妍祇以姿態少東風無人憐粗枝
與大葉落落山霞天嗟彼柔媚色遜茲心性堅

忍冬

柔條風不折翠葉霜不槁三月作幽花濃香沁詩腦縈
縈籬落間依傍得不倒雖有耐寒姿毋乃攀援巧日夕

雪門詩草

卷四

蒿目集

五

折花歸金銀滿懷抱

櫻桃

城南馬家園林亭足烟樹一自兵火焚羣芳埋毒霧
憔悴櫻桃花殘枝已僵仆兒輩負以歸栽我讀書處欣欣
喜再生密葉青雲布開窗笑春風淡碧花如故歷變全
天年枯樹何須賦

蘭

種竹望新笋種蘭愛新芽四月梅雨過閭閻生意賒紅
尖啄苔破脫淨汗泥沙新葉漸菴茂舊葉殊鬢髻物類

有代謝吾生豈無涯。徒倚芳砌側。薰風看奇葩。

石榴

忽見榴花明。悵然朱夏改。熱艷漸逼人。幽芳竟何在。重
重綠樹波中盪。珊瑚海爲我招薰風。今已十餘載。相別
復相看。炎曦驚異采。秋來不出門。芳實爲君待。

茶蘼

香風何處來。午榻酒初醒。那知茶蘼花。晚信爭春盡。微
雨恰初晴。倏忽羣芳隕。朝華悔先凋。織毼安後挺。共荷
東皇榮。遲暮心偏忍。誰其振餘芳。林泉領空引。

雪門詩草

卷四

蒿日集

六

白桃

天桃春風開。特色將春笑。紅顏往往然。世塗猶重我。
種冰雪花。冷澹人不要。香清招蝶遲。意定息蜂鬧。誰顧
絕俗姿。青春出年少。芳庭悄無言。仰首明月照。

木芙蓉

去年種芙蓉。秋來竟花發。今年更茂密。綠玉裁根葉。人
喜晚節佳。我愛生機捷。短牆三四枝。隨意翠雲疊。名花
苦栽培。悅目亦交睫。何如易生者。朝種暮栖蝶。

蠟梅

梅花似高士。蠟梅似黃冠。鍊骨成金色。那畏冰雪攢。園中素心者。老枝蒼蚪盤。持鋤掘旁葉。分種期族寬。根香沁土烈。十日留指端。本性有如此。數榮甯不然。

畢小菴從戎崇陽以功授縣令入都送行

一麾淨掃崇山霧。論伐銓官將北去。不羨君膺墨綬榮。羨君保障家鄉固。崇山雲接岳山雲。餘氛綴我巴陵軍。大軍東下難返旆。小醜跳梁多狡獪。長沙東北少藩籬。么麼未翦終貽害。鞭揮駿馬曉搜山。黃腰墜羿形狼狽。旁邑通山與通城。萑苻一洗天日晶。父老咨嗟使君勇。

雪門詩草

卷四

蒿日集

七

欲留健令靜。枹鳴此時軍。政正旁午。黃札除官多。外補甯朔營中領。行選鎮西板宦從。民舉酬庸破格古。今同而君掉頭色。然拒自古男兒恥。沈浮神鷹豈肯入人鞴。別有良謀不能用。青天萬里惟吾投。好雲離岫他鄉雨。明月臨霄異地秋。檢點行囊暮春後。薊門路遠風日悠。桃花自卜河陽種。斑竹難禁湘上愁。鼙鼓中原猶未息。藏鋒休露舊吳鉤。

端午

紅榴帶雨放端陽。故事猶傳角糴香。漸少飛鳧誇競渡。

只聞躡柳辦軍裝。閩中符索防兵贈。江上風波鑄鏡忙。
世亂未平佳節過。閒烹翠釜浴蘭湯。
憶昔湘城士女遊。蜀葵花紫綴釵頭。衣香東郭臨荷沼。
人影西隅渡橘洲。鐵佛林深槐日永。金剛苑鎖竹風秋。
不緣兵燹琳宮盡。銷夏能來飲一甌。
青蒲碧艾又年年。暑雨連綿楚塞懸。雲護蛟龍翻水窟。
風侵羅葛冷江天。烹臬無術求金彈。奪錦何心上綵船。
一笛梅花消歲月。自慙憂國讓人賢。

出部

雪門詩草

卷四

蒿日集

大

兵符未靖世艱難。附部烟塵只暫安。蒿磔幾家尋舊址。
茅茨暫日蔽秋寒。驚心鄂渚詢來楫。愁見柳雲走去鞍。
時樂已蕭瑟陶公祠下路。卧鐘孤樹夕陽殘。

為陣亡軍士作

曾披獸鎧救嚴親。為保金湯竟隕身。一樣髻年識忠孝。
湘山杜宇叫青春。
蔡公墳下草鬚鬚。化碧流丹血暈酣。讀罷青蓮諸樂府。
傷心一曲戰城南。

驟雨

山○白○雲○昏○驟○雨○傾○江○鳴○水○急○一○舟○橫○吳○天○黯○淡○迷○飛○鳥○
楚○塞○蒼○茫○辨○客○程○已○見○青○楓○綠○岸○亞○卽○看○黃○沫○擁○沙○行○
舵○篷○兀○立○涼○飈○撼○濕○透○征○袍○句○始○成○

上闌歌

溪○風○吹○斷○篙○師○歌○灘○高○水○急○將○奈○何○畫○槳○蘭○橈○進○復○却○
可○憐○橫○閘○生○白○波○波○濤○處○處○阻○行○客○人○到○江○湖○頭○易○白○
鷺○立○蘆○花○秋○雪○飛○古○戍○寒○雲○天○又○夕○

過萍鄉山

重○踐○西○湖○約○江○淮○道○未○通○天○誅○羈○粵○賊○客○路○繞○吳○東○盤○

雪門詩草

卷四

蒿日集

九

折○溪○山○險○艱○難○日○夜○同○坐○看○秋○色○老○霜○滿○豫○章○楓○

蜀商

舊○業○應○難○舍○時○危○尚○遠○遊○關○河○艱○繞○道○巴○蜀○到○經○秋○似○
我○羈○微○祿○因○渠○倍○旅○愁○君○平○如○可○識○爲○卜○世○沈○浮○

望宜春城

灘○迎○灘○送○往○來○頻○閱○盡○驚○濤○險○後○身○兩○岸○青○山○背○船○去○
雲○螺○雙○擁○古○宜○春○

絕句

碧○靄○遙○山○混○紅○雲○落○日○生○晚○風○船○欲○繫○隔○岸○桂○花○明○

藤蘿留古豔。杉櫟識新栽。絕壁何年鑿。浮雲撥不開。
江霧漁燈隱。灘風客夢涼。寥寥聞犬吠。遠岸有村莊。
灘石剝落青。水苔搖曳綠。清淺照詩眉。秋日袁江曲。
蘆穗淺紅綿。江澄碧玉天。纖鱗不食餌。閑然釣漁船。
布衾秋夜長。寒覺五更霜。無限江頭樹。朝來幾葉黃。

逢人

西風吹楚客。東涉袁江水。逢人問潯陽。官軍近何似。鄰
船歸遇潯陽兵。停橈知我楚人聲。却道長沙舊桑梓。關
心兩粵邊防驚。衡岳妖氛吹不斷。飛芻誰繼南康營。紅
雪門詩草

卷四

高日集

二十

霞漲海天豈。醉碧月沈水。江又吞黃昏。飛鳥去無極。茫
茫烽火愁家室。各倚船窗相太息。

雨歇

舟中五更聞暴雨。溪風亂擾舟人語。雨歇風收天欲明。
烏雲漏罅星晶晶。汀蘆渚荻秋湖長。卧聽舟師解纜聲。

昌山灘

夾岸秋山曉翠寒。宜春江上袷衣單。西風無恙篙師喜。
紅樹將迎客下灘。

小立僧雛碧水濱。猿巖構宇賽江神。未知平得風波否。

無○限○燒○香○伐○鼓○人○

臨江夜泊

灘○平○水○碧○袁○江○盡○微○雨○西○風○已○暗○天○官○渡○寂○寥○津○吏○去○
柳○樁○人○繫○夜○來○船○

吳艘

青○篷○白○榜○木○蘭○艘○南○浦○風○煙○冷○畫○窗○莫○問○吳○東○行○李○事○
三○年○不○敢○出○潯○江○

初雁

紫○塞○沙○平○足○長○生○鵬○雲○作○底○又○南○征○也○知○吳○楚○紛○繒○繳○

雪門詩草

卷四

蒿日集

三

尚○爲○江○湖○續○舊○盟○碧○莖○連○年○秋○雨○足○紅○霞○一○路○暮○天○晴○
干○戈○我○亦○携○雛○出○薄○宦○驅○人○似○不○情○

守風豫章

大○風○不○掃○西○山○雲○枉○卷○狂○濤○震○彭○澤○長○沙○遊○子○心○膽○粗○
挂○席○欲○盼○江○波○白○榜○人○持○重○莫○肯○前○連○日○繫○住○深○潭○烟○
昨○宵○西○山○毒○龍○吼○噴○沙○穿○石○聲○更○顛○關○心○浙○瀝○晃○汀○雨○
恐○助○波○潮○溢○浦○溢○浦○溢○浦○樓○船○烟○岸○橫○蓼○花○紅○濕○蘆○花○舞○
莫○遣○秋○聲○鼓○角○連○怕○有○征○衫○悲○戍○苦○

泊鄱陽湖心

鳥篷載雨過鄱陽湖樹湖雲望渺茫
傍晚風濤迷去岸
輕舟留住水中央

買魚沽酒餉篙師
吩咐同舟著力持
帆峭浪高行不得
自關風信匪人爲

戢戢青蘆萬葉聲
吳天黯淡濕雲行
鄰船亦有長征客
如此風波問幾程

非鳧非雁亦非鳥
帶雨橫舟啞啞呼
鄉夢未成風正急
又添秋思滿江湖

重陽 安仁道中作

雪門詩草

卷四 蒿日集

三

辭家一月見重陽
水驛迢迢野菊香
白雁乍衝彭澤雨
丹楓應老洞庭霜
風高江上征帆迅
酒醒天涯客路長
莫道登臨無處所
東南半壁自秋光

九月初十日作

昨日重陽不成醉
今日西風還有情
檣烏懸空日皎皎
江雁橫塞天晶晶
待我杭城定霜菊
懷人楚水貯香橙
秋心易老詩心健
更買花糕題子京

鷹潭

野店向江開
江隄石級迴
估帆兩三泊
疏柳淺深栽
春

日○曾○兵○燹○秋○沽○便○酒○杯○誰○家○夕○陽○館○依○舊○好○樓○臺○
貴○溪○望○仙○人○橋○

西○風○有○定○信○西○江○無○定○流○川○原○助○屈○曲○終○日○屢○迴○舟○極○
盼○愜○幽○賞○萬○象○涵○清○秋○石○橋○跨○頽○壁○仙○人○爲○誰○修○上○有○
紫○花○蘚○下○有○碧○玉○溝○客○子○不○曾○躡○白○雲○來○悠○悠○清○風○吹○
我○心○飄○然○隨○雲○遊○

暮色

一○片○虛○明○象○紅○霞○照○水○西○晚○風○吹○浪○細○初○月○出○雲○低○鄰○
舫○誰○簫○笛○江○船○自○鼓○鼙○秋○天○饒○暮○色○世○變○莫○含○悽○

雪門詩草

卷四

蒿日集

三

朝晴

凍○雨○五○更○灑○朝○來○江○更○晴○灘○蘆○團○水○潤○嶺○樹○帶○雲○明○村○
落○散○黃○犢○江○城○飄○翠○旌○玉○梁○和○碧○麥○刈○種○各○營○營○

夜深

月○出○溪○山○朗○秋○深○宙○合○清○征○人○趁○途○急○深○夜○尚○舟○行○岸○
樹○高○低○影○漁○歌○遠○近○聲○但○知○風○力○順○莫○問○泊○何○程○

到日

桂○香○風○裏○出○長○沙○枉○度○重○陽○雲○水○涯○到○日○杭○城○秋○色○老○
小○春○紅○蕊○看○梅○花○

秋暮

春去畏兼秋。秋深轉欲留。青林似花葉。休便下枝頭。

舟中夜起

夜半呼燈起。鄉心難自持。灘泉驚客醒。明月怪人痴。獨坐秋偏爽。孤吟冷不知。朝沽桑落酒。更剩幾金卮。

九月十五獅江翫月
秋色東南在。霜寒月不寒。吳天依舊照。江夜幾人看。岸浸林楓黑。雲飄老桂丹。虛光何晃漾。舟泊近谿灘。

見雁有感

雪門詩草

卷四

蒿目集

五

飛到衡雲更不飛。灣灣湘水伴晴暉。那關五嶺陽和少。瘴草蠻花事總非。

玉山道中

紅霞紅葉玉。山秋客。沂西江欲盡。頭碎石磨舟。終日響層樓。傍水昔年遊。重來城闕浮。雲變回望鄉關暮。藹收過此清波與潮接。錢塘盡處是杭州。

常山曉發

曉霞如赤鳳。飛出海東頭。客子侵晨發。仍爲浙水游。湖清應繞鄣。濤白正宜秋。一路寒潭碧。蘆花逐客舟。

僑居吳山西麓

初居吳山東。開門面江淥。昨移山之西。坐對錢湖曲。湖
中雙峯白雲多。好風吹落簷下宿。簷前紅梅花。霜孕香
心足。凌晨數蕊開。似賀新居縛。天涯僑寓誰與親。一樹
梅花是主人。朝來暝酒閉門坐。獨對寒梅數夕晨。

丙辰年

視事常山閱視曹城有感

前令李君守常山。西北築城作關隘。掘土纍纍白骨多。
知是何年爭戰地。溪深山僻風雨危。去年城築今年頽。

雪門詩草

卷四

蒿日集

二五

可憐城頽信又警。武營移文促修整。不惜修我城。亦須
練爾兵。古來地利宜人守。今日屯兵空復名。定陽三里
灘。前月鼓聲難敵管絃聲。

書常山軍事

警報從西至。官兵早向東。將軍防後策。壯士曳兵雄。息
鼓窺灘月。歸旗盼順風。笑他臨陣退。轉覺失從容。
謂敵旁抄慣。宜嚴小徑防。紛紛屯野谷。寂寂任康莊。擁
住民房。暝空支布帳。涼山人休放獵。無使夜軍惶。
舊軍長不練。又復募新軍。肴饌譙樓月。笙歌野戍雲。長

年○支○坐○餉○無○志○奪○奇○勲○三○里○灘○前○樹○頻○來○寶○馬○勤○
頭○銜○飄○孔○翠○細○認○是○商○人○海○運○連○年○富○軍○容○此○日○新○居○
奇○同○搏○戰○握○算○亦○經○綸○十○二○牛○空○犒○弦○高○非○我○倫○
出○身○難○論○將○當○道○一○青○衣○大○事○商○奴○隸○親○兵○聽○指○揮○帷○
房○傳○令○密○花○柳○出○郊○圍○籠○絕○諸○軍○冠○寒○鴉○學○隼○飛○
畫○舫○圍○紅○袖○殷○勤○唱○大○隄○拖○船○勞○部○曲○敵○宴○犒○偏○禪○虎○
領○情○無○那○蛾○眉○氣○易○低○醉○歸○誰○禁○夜○遮○莫○五○更○雞○

挽羅忠節

忠節平生講學紹宗閩洛倡率生徒轉戰吳楚

雪門詩草

卷四

蒿日集

三

克城三十經戰二百由訓導擢甯紹道茲攻武
昌賓陽門於三月初二追賊砲傷左額八日

援江援鄂表奇勲

太息蘿山子弟軍
藹藹詩書擐甲胄

蒼蒼岳瀆起風雲
羣期召虎清淮浦
豈料岡龍斷漢濱

猶有生徒饒將畧
他年應報掃妖氛

與郭筠仙太史夜話

筠仙爲滌帥來浙商餉不獲歸營過此流連者數日

會帥奇師救豫章
旋同忠烈中丞樵戰潯陽
茲來東浙

愁滄海詎爲西湖訪
綠楊借餉未通吳楚隔看山且去

水雲涼琅玕腹裏珠韜滿贈我新詩吐劍鉞

紀事

金陵大營仰資浙餉浙無勁旅有警則乞援於
向帥撫建既失衢防告嚴金陵方撥兵來而三
月廿八甯國失守乃改援赴甯東馳西折奔走
既勞左撥右抽中軍遂薄至五月而七甕橋之
大營潰矣

正備三衢鄰柝驚忽傳甯國失名城尋常浙地頻輸餉
倉卒金陵許借兵畫舫檣迴嚴瀨雨花驄塵撲雪溪晴

雪門詩草

卷四

蒿日集

毛

可憐勁旅頻抽撥愁煞江南七甕營

挽江蘇巡撫幫辦軍務吉勇烈公

勇烈在營夜常不寐平上海廣匪屢戰有功既
受幫辦軍務任謂攻堅不如斷糧野戰不如扼
要四月檄候補道江甯知府劉存厚結營於高
資烟墩山賊悉銳來圍知縣松壽鹽知事張翊
國戰死公遂率親兵馳救方衝入營而賊眾四
合中砲陣亡存厚欲翼尸出不克戰死後軍士
以馬駝勇烈尸衝出京口副都統綳濶已戰出

雷公哭日吾與吉公偕入吉公死何忍生亦投江死
吉帥雄心斷賊糧高資要隘結銅梁功雖不就丹霄炳
尸竟能歸駿馬良開府何人曾血戰從官幾輩盡剛腸
連朝梅雨天舍淚京口波濤萬古香

挽 欽差大臣湖北提督向忠武公

忠武字欣然蜀人從楊忠武擒張格爾有功由
固原調廣西提督追賊至湖北受 欽差大臣
關防至金陵逼城而營爲蘇常障蔽本年五月
營潰退丹陽以七月薨於軍遺事囑江南提督

雪門詩草

卷四

蒿日集

天

張國梁主之已而 朝命江甯將軍和春接統
其軍

障蔽蘇常已四年丹陽星隕早秋天曾擒瀚海生酋出
回望巴川故國懸百粵偏師愁瘴癘長江專閫恨烽烟
國恩未報臨終呼仗爾桓侯力斡旋

白龍洞謝降自嘲

昨日禱雨白龍洞露夜焚香天未曙今日得雨謝山靈
瞳瞳紅日在高樹求何來早謝何遲世情衰薄神所嗤
雷公欲怒電母笑太空冥冥如無知我操豚蹄聊自懺

千古官場慵散慣。神龍垂角試聽之一人莫挽衆僚晏。
酣歌恒舞舊成風。披月戴星翻致訓。交階交戶愧前賢。
詩成浹背雨淋汗。

廣信解圍紀事

頻年戰事紛紛爭鄉兵義勇無定名頻年蟻賊洶洶起。
水○城○山○狐○難○確○指○卽○如○廣○信○昨○被○圍○逆○踪○飄○瞥○甯○都○來○
或云閩疆小刀之遺孽。或云吉水邊錢之渠魁。其實桂
林老巢有伏莽。東走會赴金陵隈。我獲逆書識情狀。不
似郢說令人猜。若乃危城似卵欲剖竟不剖。羣頌文忠

雪門詩草

卷四

高日集

完

林少穆之壻沈太守文章經濟得真傳曠日堅金締良
偶吏民駭散僮媪逃百雉崔嵬中兩口撫州建昌正會
圍那有偏師扼旁走沈思定計乞浙援一函書達同鄉
友衢鎮饒君福海人斯時虎旅玉山屯外貌頎長實內
荏寶馬長戀城草春今春撫建信繁饒駐常山屢請出札終不肯出奈何昔怯
變今勇賴有虎將二人來衛擁一將畢君名定邦字康侯山東籍年
廿餘後陣玉樹堅一將賴君名高翔漳州人後陣心諡勤毅猿臂聳偏
心諡愍烈主帥安大厦原需衆材拱荷花時節共杯盤酒
間咳唾威霜涌果然三捷掃妖氛保全鐵壁銅牆鞏圍

解中秋月正圓。星使獅江回去船。時廉樹峯侍郎正按
遣兵迎入衡文筆。奏捷書武試苑。桂花撲弓弦。太守

夫人敢妝篋。銀簪金釧輪犒錢。漳兵詔勇謹然笑。羣道
維桑氣誼堅。我聞捷信轉太息。私念忠節能格天。天意

果何如。細爲君家逃。八月初七貴溪失。五秀才兵俱失
律。貴溪有五秀才之兵。乃石景芬所團集。一屈超過弋
秀才躍馬殺賊陣。凶餘秀才乃潰。惜其名。超過弋

陽只二程玉山啟行。亦是日。若非大雨滂沱。師行陸
路里三十天。遣波臣助蠶神。沙溪下駛行舟。疾虎旅乘

流賊阻雨制勝。兵家判勞逸。入城飽食出城迎。是役奇
雪門詩草 卷四 高目集 三

功爭牛刻岳瀆公侯思效靈。西江秋樹青更青。長歌聊
備中興史。始信河水之說非不經。

六兄力裳至常山

禮部三經試年華四十餘。家貧資祿精志決。棄詩書雪
警。鄱湖雁霜烹定水。魚干戈天地滿。筮仕費踟躕。

塔山試士

官軍屯考舍。試士塔山巔。燒燭疑參佛。携詩好問天。風
簷長至短。凍硯薄水堅。僻地人知禮。衣冠却整全。

丁巳年

立春過屏山寺軍裝所訪王柳橋率成

蒼翠屏山縣署東。古樟圍寺小牆紅。詩人日對維摩坐。不覺春光到客中。

獸鎧蛇槍此地藏。從戎浙水耀軍裝。東風已解河灘凍。不解刀矛背上霜。

戎機閒暇小詩成。險覓狂搜慷慨情。桃樹未花梅已瘦。一簾微雨潤棋枰。

雷封我已近瓜期。留別難忘舊雨思。幾日西泠橋畔酒。繞船烟柳醉君時。

雪門詩草

卷四

蒿日集

三

贈草坪尉方荔汀

名兆沅
崑山人

常山西去玉山東。翠藹蒼霞絕徑通。此地宦遊真吏隱。五年羈帶却兵戎。風塵未定青琴懶。詩酒難消白劍雄。一片賢良峯上月。清光曾滿太湖中。

野店門前午飯香。三吳百貨往來場。一從逆燄橫江右。漸覺炊烟杳道傍。通塞河山關國脈。稽巡星月爲邊防。分符我乍居東浙。花棒憑君借保障。

記得紅榴欲破花。高齋小憩脫輕紗。青山導我頻經路。綠柳團君早放衙。滿架藏書搜曲譜。一池新稻似田家。

時危尚有微官樂，梅尉何嫌俸未奢。
三衢相見恰經年，又向東風敞別筵。
細雨梅花江畔路，輕寒楊柳渡頭天。
翩翩去鳥青雲濶，瑟瑟離歌翠袖憐。
莫聽灘聲咽危石，強君同醉卧春船。

留別定陽

西江連歲擾狼烟，廣信秋圍恰去年。
敢畏繁難思退步，却令匆促颺迴鞭。
吏情早被梅花笑，別夢還憑柳色牽。
吳越上游山水窟，囊琴欲走更纏綿。

年來宦况似冰寒，自指頭銜向月看。
撫字未能蒙上賞，

雪門詩草

卷四

蒿日集

三

瘡痍何日報平安，雲連黃嶽喧征鼓。
路出彭湖走戰鞍，吩咐義民同保障。
莫嫌供億費盤餐。

回首西湖正好春，六橋楊柳趁開身。
畫船倚岸應招我，麴院流醪也醉人。
簿領暫拋長二月，余昔桐廬渚安 鶯

花相伴，且經旬。賢良峯下拳拳石，俱以二月卸簔 恥載江頭說宦貧。

多謝諸公代挽留，鈴轅遠叩赴杭州。
愧無桃李遺潘令，辜負兒童迓細侯。
東浙輕雲隨客散，西峰明月爲誰秋。
白龍洞裏如相憶，他日重尋舊雨遊。

桐江夜泊

千山橫瓊子陵臺暮入桐江江岸開微月燈昏船倚岸
無人知是故侯來
呼僮籠燭傍洲行一一江航問姓名舊識翠娥今在否
烟簫雲笛不分明

春泛浣溪

溪草披柔綠山花發烈紅我來正三月萬彙各春風
好鳥掠船過飛鳴如自雄浣紗人不見江上霧濛濛

登諸暨署樓

楊柳春風繞縣隄危樓高眺與雲齊南來浣水通滄海

雪門詩草

卷四

蒿日集

三

東去長山入會稽霸業已難追越絕美人何處訪村西
祇今部外桃花好細雨如煙鷓鴣啼

得力常兄京都書

家兄寄我京都信爲道京都百貨昂祇有銅捐得官易
更兼鐵鈔是錢荒江淮未靖供輪紬燕冀無年稭程傷
深賴司農籌畫密不愁皖彼悵牛箱

五指山

雲開五指欲摩天秋雨初晴認儼然
岩上仙人招我近此身如落華山前

斗子巖

斗巖山下龍神廟。禱雨常須燕降壇。我來歲歲康年降。轉覺無因宿內壇。

涼風洞

以瓦罌貯水當洞口則液然滲出物理不可解如此

洞裏如聞鐘磬聲。洞邊風挾雪霜鳴。瓦罌貯水因何滲。難向山靈扣物情。

過南泉嶺至孟村作

義安西北南泉嶺。嶺下流移鄒孟家。聖派賢源肆流行。蒼山碧嶂相還遮。山中積石鬪巉刻。頗類鳧繹含丹霞。

雪門詩草

卷四

蒿日集

五

烟闌樓舍填平谷。曠濶不與桃源差。村人讀書二三子。導我憇舍烹山茶。繞階細草茁白石。春風曲欄開名花。已喜州民轄聖裔。更欣足跡來幽遐。干戈未定思避地。願買茆屋栽桑麻。浙東偏僻少爭戰。古來流寓文人嘉。南渡至今七百載。名臣孫子紛萌芽。君不見衢州亦有孔家廟。至今博士森國華。

理書

小摘幽蘭插玉螭。案頭無事理殘書。陳編自檢心情靜。舊帙重摹手法疏。敢以文章荒政事。奈因簿領失居諸。

蕭齋息慮參閒趣。窗外芭蕉綠又舒。

聞慶兒去腊際浙

三歲爾失恃。夜依祖母眠。十二我遊浙。相思隔雲天。十九
六失祖母。我歸彌愛憐。十八爲結襦。伫開並頭蓮。十九
我仍出。送我登江船。宦途不携爾。恐誤爾書編。囑爾伴
幼弟。發憤及青年。爾性頗沈敏。詩句多芊綿。有杏花有柳絮多情
作雪香句同堂諸伯仲。嘖嘖讓爾賢。去歲寄書來。愁我
鄰烽烟。今年無書到。哭爾隔重泉。爾母乳三男。長兒襁
褓捐。次兒今壯逝。信是我命偏。東風吹淚雨。波漲浣溪

雪門詩草

卷四

蒿日集

三

前

柯橋暮感

短笛誰家起夕烟。柯橋人正盪溪船。柁樓晚飯成今事。
亭竹知風憶昔賢。吳越晚雲多倚樹。滄江明月易當天。
風光不改斑毛變。東浙羈棲已十年。

舟中遇雨

南山雲初生。北山雲已雨。西雲不成片。缺借紅霞補。飄
風何處來。吹雨入船戶。水氣生微涼。詩情入秋浦。

迎霜降作

諸暨霜降前日文官出迎載在縣志歲率爲常
獵獵西風吹白旗城頭碧柳變黃絲縣官出城祭六纛
居民圍觀塞路歧迎秋西郊古有禮厲兵選士公卿使
本朝霜降彰稜威文臣不與武臣耳小隊弓兵擁戟
寒焚香來拜西郊壇三霄青女應大笑笑我何事侵人
官虎皮兜襖健夫舉自顧平生味軍旅白鷗騰效鷓鴣
飛無數鴉軍空色沮壯士於今不肯前祇合迂儒折樽
俎君不見自從粵賊擾中華小人退縮化蟲沙多少書
生都作健衝鋒快馬五雲靴

雪門詩草

卷四

蒿目集

三

山陰舟中作

白雲在嶺寒光逼天羣溪蔓絡貫入巨川茸茸宿麥涵
潤敷鮮村舍三兩開扉水前聞無人語惟起炊煙中流
眷顧一鳥翻然春聲欲播知近新年綠髮蕭散客行如
仙內澄紛慮外觀物妍順風放櫂舟人安眠

挽畢小菴太守

名大鈺與

瑤

同里同學又兼姻亞以克復崇陽

軍功選仙居縣從軍甯國晉知府政防婺源力

戰陣亾其姪少湘同與難婺源人感其忠紳士

夏改甫爲立四君祠四君者徐勇師長鏹也其一則余忘之矣

君乘白額馬。我謂不宜軍。勇敢天應妒。淒涼信竟聞。鶻啼湘水月。虎嘯婺山雲。愛姪同時殉。千秋家乘芬。絕地真堪恨。連年喪蓋臣。孤軍當衆寇。一死作完人。江皖開羣鑰。衢嚴接比隣。浙東防更急。當事莫因循。

戊午年

二月紀事

石逆達開犯衢州時宰西安者爲同年李正農

雪門詩草

卷四
蒿目集

三

文襄之七世孫也。先是賊未至衢。衢人聞警報。扶鸞以占吉凶。值文襄降鸞云。賊必至衢。然當爲默佑已。而正農蒞任衢。終無恙人相說以爲文襄効靈云。

狂風震東浙。二月桃花亂。屏藩信江開。鎖鑰仙霞斷。我軍守定山。懷玉防越窟。那知江右賊。詭譎饒勝算。不攻信州城。南繞饒溪岸。銜枚晝夜趨。萬騎浦城貫。得浦遂窺浙。急遽驟難捍。須江奈使君。興國州孝廉。以增號春屏。練勇鬪精幹。兵民內不和。肘腋起禍患。坐此失城池。右斷衢州腕。

衢州勢巍峩。巨鎮巨雲漢。避劫居仙人。看奕斧柯爛。我

朝開國年。耿逆此犯順。桓桓李制軍。風雲排鐵陣。兩浙

保完甌。三藩掃餘燼。深謀得地利。豈盡關天運。年來三

衢堞。修築更險峻。福將首來援。福將軍名興。自江右來。皖兵相繼

進。張京堂名芾。守徽亦分兵相救。和帥撥勁旅。和帥撥金陵大營兵至。赫赫軍威

振。饒鎮雖怯弱。署饒鎮饒梅臣。名廷選。閩人。調和士民信。主客將既

和。么麼膽應震。何況吳越。饒飛挽無乏困。士飽而馬騰。

滅此炊朝飯。江燕莫驚飛。海鯨且游物。坐見富春驛。捷

書走傳箭。聞有吾同年。現宰西安縣。派出文襄公。世德

雪門詩草 卷四 高目集 天

歌。通駿遙遙二百年。此地同兵難。乃祖翊龍興。乃孫附

驥。奮前後雖偶然。始終有天贊。斬妖除飛來。吉識應相

印。

仲春送畢瀆齋親家由暨入都時逆氛已逼衢州

消息。衢防緊。天涯楚客驚。干戈難久住。書劍又長征。北

闕青雲近。東風紫叱輕。芷蘿花色好。休忘越中行。

水驛瓜洲靖。無須繞孟河。烟花娛客夢。江海定妖波。戰

久兵心壯。時清仕進多。平吳如有策。一為撥魏科。

知有思兒淚。看雲一路垂。鴿原須急難。蜀魄莫空悲。報

國完人往全家賴子持他時博微祿著意撫孤兒滄齋

巷太守去年陣亡於婺源

昔會逢三月今離正暮春。飛花驚聚散。烽火益酸辛。薄
鹽慚予色。長途愛子身。安危終有日。不必感風塵。

賊逼永康書事

倉猝束行李。呼舟不得舟。瘴雲滄海湧。急浪浣江流。桃
嶺人誰守。蘿山客自愁。臨行囑兒女。此去向蘇州。
守土復何說。無家累且輕。高朋條已散。老僕請同行。野
渡愁雲接。山城夜雨鳴。榴花開早蕊。照我淚痕明。

雪門詩草

卷四 蒿目集

三

前歲常山宰烽隣。廣信烟干戈。猶昨日。遷徙又今年。土
寇乘機嘯。銅丸鎮夜懸。疲兵三兩個。露宿破城眠。
深懼金華震。紛紛避亂多。漁燈疑炬火。殘丐訝么麼。酒
長荒村價。雲翻古洞窩。可憐桑正綠。餒殺幾蠶蛾。

聞處郡失守誌慨

狂飈來不測。吹動枯蒼烟。皤皤恆太守。守枯二十年。坐
高無事福。白髮酣春眠。鄭君得瓜代。玉蟾纔一圓。春雨
洗城倒。身敗名遂鑄。前守非避就。桑榆歸志堅。後守奉
文檄。常防正烽烟。臨歧送行客。錢江排歌筵。舉盞賀得

地○此○行○如○登○仙○誰○知○蟻○垤○躡○齒○折○脣○反○全○衝○途○危○轉○固○
僻○境○安○忽○顛○禍○福○那○可○料○仰○首○問○蒼○天○

八月衢處解嚴浙境肅清詩以誌之

猖○獗○勢○與○春○風○來○飄○警○竟○逐○秋○風○去○塵○戰○無○多○士○卒○完○
惟○有○飛○芻○竭○財○賦○北○漕○截○留○十○九○萬○倉○儲○碾○盡○烏○鼠○除○
一○朝○捷○報○官○僚○喜○青○雲○共○望○驂○駒○附○此○時○波○瀾○彌○乾○坤○
勞○爵○那○能○吝○酒○尊○所○惜○封○疆○分○畛○域○不○將○清○豁○答○君○
恩○東○鄰○捷○奏○朝○投○閣○西○土○邊○封○夕○刺○閭○將○相○有○權○聊○復○
爾○末○僚○希○寵○又○何○論○躊○躇○四○海○爲○家○念○獨○對○桂○花○秋○掩○

雪門詩草

卷四

蒿目集

罕

門

慨事

兵○驕○不○可○戰○民○驕○乃○過○之○愚○民○安○太○平○小○費○吝○刀○錐○迂○
民○誤○詩○書○動○談○王○者○師○霜○露○生○疾○疫○鋒○鏑○起○瘡○痍○千○里○
事○行○役○耶○娘○相○別○離○苦○衷○向○誰○訴○跡○跡○多○魁○奇○小○節○相○
訶○責○徒○令○壯○士○悲○
取○笠○覆○甲○斬○古○帝○權○術○耳○藉○此○收○民○心○豈○堪○律○壯○士○勝○
朝○王○威○甯○戰○士○挾○歌○妓○不○問○挾○歌○妓○但○問○何○勇○技○無○勇○
空○守○法○無○法○不○敢○死○糜○餉○與○擾○民○幾○時○摧○敵○壘○

諸暨縣湖種柳

桐廬廳事前會種蠟梅樹逾年過訪之已被後人鋸常
山卧閣雙桂枝澆泉刷蠹秋風知今年却又被兵燹香
風能否如當時甘棠不伐古時有桃李河陽今在否種
花○人○少○看○花○多○玩○花○時○淺○澆○花○久○世○事○榮○枯○那○可○期○黃
鷗○勸○爾○一○杯○酒○後○來○培○植○知○為○誰○多○情○仍○種○浣○溪○柳

幕中詠

書記

朝題桃箋紅夜署瓊函翠借問阮元瑜家書寄也未

雪門詩草

卷四

蒿目集

聖

知賓

華堂一面緣肝膽強相白含笑通姓名兩人俱是客

金穀

倉庫貯自空薄書數自掌風吹蓮幕開錯落算珠響

刑名

叔世尚姑容而余重猛忍殺人救世心良朋肯不肯

觀潮有感

江雲變色江風起舟人呼咤潮來矣一條白龍才際翔
萬丈雪山面前峙江岸閑人縱壯觀江中波浪愁游子

金○戈○鐵○馬○霎○時○間○人○海○風○濤○亦○如○此○

對月有感

團○團○明○月○鑄○金○甌○千○秋○萬○歲○素○波○流○那○知○浮○雲○攬○亂○山○
河○影○使○我○珠○宮○玉○宇○無○清○秋○初○傷○桂○樹○林○漸○失○銀○漢○色○
仙○人○斧○柄○空○自○持○八○萬○四○千○之○戶○修○不○得○差○我○廣○寒○宮○
變○為○荆○棘○場○吳○剛○與○結○隣○何○事○東○手○無○彈○章○我○欲○乘○風○
問○嫦○娥○天○路○修○窈○愁○實○多○夜○深○搔○首○向○碧○落○橫○倚○長○劍○
發○浩○歌○

雪門詩草

卷四

蒿日集

望

10741

發浩歌

問○淑○烟○天○翻○越○後○深○宣○夜○寒○霜○滿○首○向○碧○落○橫○倚○長○劍○
變○為○荆○棘○場○吳○剛○與○結○隣○何○事○東○手○無○彈○章○我○欲○乘○風○
問○嫦○娥○天○路○修○窈○愁○實○多○夜○深○搔○首○向○碧○落○橫○倚○長○劍○
山○人○斧○柄○空○自○持○八○萬○四○千○之○戶○修○不○得○差○我○廣○寒○宮○
西○溪○與○我○共○宮○王○宰○無○龍○府○倚○葛○封○樞○林○樞○火○幾○萬○年○
團○團○明○月○鑄○金○甌○千○秋○萬○歲○素○波○流○那○知○浮○雲○攬○亂○山○
樓○其○音○想○

金○戈○鐵○馬○霎○時○間○人○海○風○濤○亦○如○此○

